

TUTÚ CÚÚ ÒÚ NÍ CADÚ_{HA} TÉ PĀBLÚ QUIHIⁿ NDAHA ÑÁYIU ÑUÚ CÒRINTÚ

Té Pāblú cādūha-dé tutú quihiⁿ ndaha ñáyiú xĩndecu ichi Xítóhó Jesucristú ndécú ñuú Còrintú

¹ Yúhú té Pāblú cāháⁿ-í tnúhu Xítóhó Jesucristú chi ducaⁿ ñi cachí Yă Ndiõxí cunduu. Te cādúha-í tutú-a ndi_{hi} té Timùteú tée ndècu ndi_{hi}-o ichi-gá cuendá daquixi-í ndaha nchòhó ñáyiú xĩndecu ichi Yă Ndiõxí ndécú ñuú Còrintú, te tutú-a cuu-xi tnàhá cuendá nchaa ñáyiú cùu cuendá Yă Ndiõxí xĩndecu nchaa ñuú yĩndèhu distritú Acăyá. ² Te xicáⁿ táhù-í núú Tătá-ó Dútú Ndiõxí ndi_{hi} núú Xítóhó Jesucristú sá ïo na chĩndee chitúu ñaha-gă xii-ndo, te ñi_u-ni ndi_{hi} ndùú-gá ná càda te ïo váha cuu iní-ndó cùndecu-ndo.

Té Pāblú cāháⁿ-dé nchaa nàcuáa ndòho-dé

³ Te chí ná cāchí-ó sã ïo váha iní Dútú Ndiõxí Yaá cúú Tătá Xítóhó Jesucristú, te ñi_u-ni Dútú Ndiõxí cúú-gă Yaá ïo cùndahú iní ñáhá xii-o, te ñi_u-ni-gá cúú-gă Yaá táxí tnúhu ndee iní. ⁴ Te cuèi nándi ndòho-o ndecu-o dico ñi_u-ni Dútú Ndiõxí táxí-gă tnúhu ndee iní xii-o, te ducaⁿ quide-gá cuendá sá nchóo cuñaha-o tnúhu ndee iní xii nchaa ñáyiú nándi ndòho ndecu, te ñi_u-ni nchaa tnúhu ndee iní táxí-gă xii-o ñi_u-ni nchaa tnúhu ndee iní-án cuñaha-o xii-yu. ⁵ Te Xítóhó Jesucristú ïo ní ndoho-gá, te ducaⁿ nchòo tucu ïo ndòho-o, te ducaⁿ ïo vãi tnúhu ndee iní ñihí-ó ndècu ndi_{hi}-o

chi ndècu-o ndihì Xítohó Jesucrìstú. ⁶ Te nchúhú nándi ndòho-ndí ndécú-ndí cuèndá sá nchòhó níhí-ndó tnùhu ndee ìní cundecu ndihì-ndo te naníhí tàhú-ndó. Te Yá Ndiöxí táxí-gã tnùhu ndee ìní xii-ndí, te ducaⁿ quìde-gá cuèndá sá nchòhó tnàhá-ndó ñhí-ndó tnùhu ndee ìní-áⁿ te naníhí tàhú-ndó, te ducaⁿ càda ndee cada cahnu ìní-ndó ndòho-ndo datná ndóhó nchùhú. ⁷ Te nchúhú ío váha sàni ndáá ìní-ndí cuèndá-ndó chi ndòho-ndo datná ndóhó-ndí, te ducaⁿ tàxi Yá Ndiöxí tnùhu ndee ìní xii-ndo dàtná táxí-gã xii-ndí.

⁸ Te nchòhó ñáyiu ndècu ndihì-ndí ichi Xítohó Jesucrìstú cuìní-ndí cachí tnùhu-ndí xii-ndo nàcuáa ní yáha-ndí cútnàhá ní xíndecu-ndí distritú Àsiá chi dàvá-áⁿ ío ní ndoho-ndí, te luha-ná te vá cùndèe ìní-ndí yáha-ndí nchaa tnúndòho-áⁿ ní cùu chi ní xehndé ìní-ndí sá vã cãcu-ndí. ⁹ Chi ní sani ìní-ndí sá ndíyi-ná cuu-ndí ní cùu, te ducaⁿ ñí yáha-ndí cuèndá sá ío-gá quíndáá ìní-ndí Yá Ndiöxí sá díú-gã taunihnu ñaha-gã xii-ndí, te ñá díú mèe-ndí taunihnu-ndí méé-ndí, te diu-gá cúú-gã Yaá dándòto cuéi ñáyiu sa ní xíhí. ¹⁰ Te diu-ni-gá ní taunihnu ñaha-gã ñá túú ní sàhni ñaha ñáyiu xii-ndí, te diu-ni-gá táunihnu ñaha-gá xii-ndí cuéi vitna, te cùtnuní ndáá ìní-ndí sá díú-ní-gã taunihnu ñaha-gã xii-ndí núú cuàháⁿ núú vëxi te vá cáhni ñaha ñáyiu. ¹¹ Te nchòhó tnàhá-ndó chìndee ñaha-ndo xii-ndí chi càháⁿ ndihì-ndo Yá Ndiöxí cuèndá-ndí, te ío vài ñáyiu càháⁿ ndihì ñàhá-yu xii-gá cuèndá-ndí, te ducaⁿ ío vài ñáyiu ndàcáⁿ táhũ-yu núú-gã cuèndá nchaa sá vãha quìde ñaha-gá xii-ndí.

Té Păblú cǎháⁿ-dé ná cuendá ñá túú ní nàyáha-dé ñúú Còrintú

¹² Te ío váha cùu iní-ndí chi cùtnuní iní-ndí sá cúú-ndí cue tée cùu ndáá dàtná cuení Yá Ndiǒxí cunduu ndècu-ndí ñuyíú-a, te diu-ni ducaⁿ quide-ndí sá cúú-xí-ndó chi mee-gǎ cúndàhú iní ñáhá-gǎ xii-ndí chíndèe ñaha-gá, te ñá túú quide-ndí dàtná sání ìní cue ñáyíu ñuyíú-a.

¹³⁻¹⁴ Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñá túú ùhú tecú tnùní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuení-ndí sá ío-gá váha tecú tnùní-ndó cuendá sá òré ná quixi tucu Xítóhó Jesucristú, te dàvá-áⁿ ío cada nínu ñaha-ndo xii-ndí dàtná cada nínu ñaha-ndí xii-ndo. ¹⁵ Te cuendá xǎⁿ nùu ní sani iní-í yáha cǎháⁿ-í úú xito núú ndécú-ndó cuendá ío cudíí ìní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha cǎháⁿ-í núú ndécú-ndó, te òré ndixi tucu-í te nayáha cǎháⁿ tucu-í, te òré nayáha cǎháⁿ-í te taxi-ndo sǎ cúú ìchi-í cuendá quíhíⁿ-í distritú Jùdeá, duha ní sani iní-í ní cùu. ¹⁷ Te sá dúcáⁿ ñá túú ní quixi coto ñaha-í xii-ndo te cudana sání iní-ndó sǎ yùhú ñá túú ní sǎha váha-í cuendá nàcuáa ní sani iní-í cada-í, àdi cudana ñáyíu ndècu ichi cuehé ichi duha, chi cue ñáyíu-áⁿ tnaa cǎchí-yu sá cúú cǎdá-yu ìⁿ sá sání ìní-yu cǎdá-yu te tnaa cǎchí-yu sá ñáhá. ¹⁸ Dico Yá Ndiǒxí Yaá ío váha quide ndáá nàha ndáá náhá cǎxi-gá sá nchùhú ñá túú dàma-ndí sá cǎháⁿ-ndí. ¹⁹ Te yùhú ndíhi té Sìlvanú ndíhi té Timùteú dánèhé ñáhá-ndí xii-ndo cuendá Xítóhó Jesucristú Yaá cúú Dèhe Yá Ndiǒxí,

te Xítohá Jesucrìstú cúú-gă Yaá ñá túú dàma-gă tnúhu càháⁿ-gă, chi cùu-gă Yaá càháⁿ mee-ni tnúhu ndáá tnúhu cuíti. ²⁰ Te ñiu-ni Xítohá Jesucrìstú cúú-gă Yaá quidé nchàa nacuáa ní cachí Yă Ndiöxí. Te sá cuendá sá dúcáⁿ quide Xítohá Jesucrìstú xiáⁿ càchí-ó sã ïo càhnu cuu Yá Ndiöxí. Te nchaa-o na càchí-ó sã díú-ní dùcaⁿ na cada-gă. ²¹ Te mee Yă Ndiöxí quidé-gă ndécú-ní-ó ìchi Xítohá Jesucrìstú. Te ñiu-ni mee-gă ní cáháⁿ ñáhá-gă xii-o cuendá cunu cuechi-o nùú-gă. ²² Te Yá Ndiöxí ní quide-gă sá nchóó cùu-o ñáyiú cùu cuendá-gă, te ní taxi-gă Espíritú-gă ní ngúndecu ndihi-o cuendá cutnùní iní-ó sã ndáa cada ñaha-gă xii-o nàcuáa ní cachí-gă cada-gă.

²³ Te Yá Ndiöxí nánhá-gă sá yùhú càháⁿ ndáá-í ná cuendá vátá quíxí-gă-í quixi coto ñaha-ï xii-ndo, te vátá quíxí-gă-í chi ñá túú cuíní-í dandìhú-í iní-ndó. ²⁴ Te nchúhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yă Ndiöxí, chi sa sàndáá váha iní-ndó-gă, chi nchúhú cuíní-ndí chindee tnúhu ñaha-ndí xii-ndo nàcuáa ío-gă cudíí iní-ndó cùndecu-ndo.

2

¹ Te ní sani ndáá iní-í sá vă quíxí ndíhi-ni-í quixi coto ñaha-ï xii-ndo cuendá sá vă dándìhú-í iní-ndó. ² Te nchòhó cúú-ndó ñáyiú tàxi tnúhu ndee ìní xii-í cúdíí ìní-í ndécù-í, te xiáⁿ nùu ñá túú cuíní-í dandìhú-í iní-ndó, chi núu ducaⁿ na càda-í te vá cùndècu váha-gă iní-ndó nàcuáa taxi-ndo tnúhu ndee ìní xii-í. ³ Te xiáⁿ nùu ní tendaha-ï tutú véxi ndaha-ndo cuendá sá òré quixi coto ñaha-ï xii-ndo,

te dává-áⁿ quiní-í sá quidé-ndó nàcuáa cudíí ìní-í te ñá díú dà dandihú-ndó ìní-í òré quexìo-í, chi nchòhó tàú-ndó càda-ndo sá yùhú cudíí ìní-í. Te cùtnuní ndáá ìní-í sá nùu yùhú cùdíí ìní-í te tnàhá nchòhó cùdíí ìní-ndó cuèndá sá dúcáⁿ cùdíí ìní-í. ⁴ Te ndàhyú-í sá ndihú ìní-í òré ní cadúha-í tutú ní dáquíxì-í ndaha-ndo, chi ío cuéhé sã sání ìní-í, te ñá túú ní dàquíxi-í tutú-áⁿ ndaha-ndo cuèndá sá dándihú ìní ñáhà-í xii-ndo, chi ní dáquíxì-í cuèndá sá nchòhó cutnùní ìní-ndó sã ïo cùu ìní ñáhà-í xii-ndo.

Nàcuáa tàú ñáyiu ñuú Còrintú cadá-yu cuèndá ìⁿ ñáyiu ñá túú quide ndáá

⁵ Te na càchí tnúhu-í xii-ndo cuèndá ìⁿ téé ní quide ìⁿ sá ñà túú tàú-dé cada-dé ndécú ndìhi-ndo, te ní quide ndàhú-xi luha ìní-í cuèndá sá ñí quide-dé-áⁿ dico nchòhó tnàhá-ndó ñí dándihú-dé luha ìní-ndó, te duha càchí-í sá lúhá-ní ñí dándihú-dé ìní-ndó cuèndá sá vã cuídó-gá-í ná tnúhu cáháⁿ-í. ⁶ Te nàcuáa ní ndatnúhu-ndo ñí quide ndáá-ndó cuèchi téé-áⁿ te sa ndói-gá cuu nàcuáa ní quide-ndo-dě. ⁷ Te vitna tàú-ndó càda cahnu ìní-ndó sã ñí quide-dé, te cuáñaha-ndo tnúhu ndee ìní xii-dé chi núu ñáhá te vá ñíhí ndéé-gã-dé cada-dé sá vãha cuèndá sá ndihú ìní-dé. ⁸ Te xíáⁿ nùu càháⁿ ndàhú-í núú-ndó sã cadá tùcu-ndo sá cùú ìní-ndó-dě. ⁹ Te ñu-ñi cuèndá iha càháⁿ-í ìⁿ núú tütú sá sà ní dáquíxì-í ndaha-ndo, te ducaⁿ ñí quide-í xító ndèé ñáhà-í xii-ndo nùu ndisa cuìní-ndó càda-ndo nchaa nacuáa càháⁿ-í. ¹⁰ Te ndéda-ñi càa ñáyiu na càda cahnu ìní-ndó ìⁿ sá quidě-yu, te tnàhá yùhú cada càhnu ìní-í

sá quidě-yu tucu. Te núu ió ñⁿ sá xíní ñùhu-xi cada cahnu iní-í te quide cahnu iní-í, te mee Xítóhó Jesucristú náhá-gă sá dúcáⁿ quide-í, te ducaⁿ quide-í cuendá sá nchòhó cuu-xi sá vâha xii-ndo. ¹¹ Te ducaⁿ te sâcuíhná vă ñihí-xi ná cada ñaha-xi xii-o, chi nchoo sâ xíní-ó nâcuáa quide-xi.

Té Păblú ndíhú iní-dé ndécú-dě ñúú Tròás

¹² Te ní xica-í cuáháⁿ-í ñúú Tròás cuendá yàcáⁿ cáháⁿ-í tnúhu sá càháⁿ nâcuáa naníhí tàhú-ó tnúhu Xítóhó Jesucristú, te òré ní quexio-í te ní ñihí-í ñⁿ ichi càhnu cáháⁿ-í tnúhu-gá. ¹³ Dico ñá túú ní cùu váha iní-í chi ñá túú ní nâñihí-í té Títú tée ndècu ndíhi-o ichi Xítóhó Jesucristú, núu xǎⁿ ní quide ndee ñní tnáhà-í ndíhi cue ñáyiú ñúú-áⁿ, te ní xica-í cuáháⁿ-í distrítú Macèdoniá.

Dàquetíhú-ó yùcu ñávâha chi ndècu ndíhi-o Xítóhó Jesucristú

¹⁴ Te táxăhu xii Yá Ndiǒxí chi ducaⁿ-ni sànu ichi ñaha-gá xii-ndí nâcuáa cunuu-ndí núú yucu ñávâha chi ndècu ndíhi-ndí Xítóhó Jesucristú, te mee Yă Ndiǒxí sâchìuⁿ ñaha-gá xii-ndí càháⁿ-ndí tnúhu-gá. Te cada iní-ó sǎ tnúhu-gá-áⁿ cúú-xí dâtná ñⁿ yúcu sǎ ïo váha sâháⁿ te ta xíténuu dicó-xi nděni ní cuu cuáháⁿ. Te ducaⁿ sâtnahá-xi cùu tnúhu-gá chi nchúhú quidé-ndí nâcuáa ta xíténuu nděni ní cuu cuáháⁿ. ¹⁵ Te cùu-ndí dâtná dicó ñⁿ yúcu sǎ ïo váha sâháⁿ, te nâcani cuendá Xítóhó Jesucristú núú Yă Ndiǒxí, te dicó yúcu-ăⁿ nchítá cuëi núú xǎndecu cue ñáyiú sa ní naníhí tàhú, te cuëi núú xǎndecu cue ñáyiú ta xíta nihnu cuáháⁿ. ¹⁶ Te sá cúú-xí cuè ñáyiú ta xíta nihnu cuáháⁿ-áⁿ, dicó yúcu-ăⁿ cúú-xí dâtná ñⁿ sá sâhni ñaha xii-yu, dico

sá cúú-xí cuè ñáyiú sa ní naníhí tàhú, dicó yúcu-ǎn cúú-xí dàtná ìⁿ sá ndécá ìní-yu, ducaⁿ sǎtnahá-xi cùu nchúhú. Te vitna chí cuǎha cuèndá nǔu ná cúú ñáyiú sàni iní-ndó ndàcu cada nacuáa ndùu tnúhu càháⁿ-í-a. ¹⁷ Chi nchúhú càháⁿ-ndí tnúhu Yá Ndiǒxí dico ñá túú ndǎhú quidé-ndí ndìhi tnúhu-gá dàtná xǐquide dava-gá-güedé, chi quide ndáá-ndí càháⁿ-ndí tnúhu-gá, te mee-gǎ ní cachí-gá sá dúcáⁿ càda-ndí te ndèhe-gá sá nchǔhú quidé-ndí nàcuáa ní cachí-gá, chi ndècu ndìhi-ndí Xítohó Jesucristú.

3

Cuèndá ìngá núú sǎ vǎha ní cachí Yǎ Ndiǒxí cada-gá ñáyiú

¹ Te cuèi duha càháⁿ-ndí núú-ndó dico ñá túú xìni ñuhu-xi sá cǔñaha-ndí xii-ndo sǎ cúú-ndí cue téé quide váha, te ni ñà túú xìni ñuhu-xi cacanehe-ndí ìⁿ tutú núú càháⁿ-xi sá cúú-ndí cue téé váha danèhé ñáhá xii-ndo datná xǐquide dava-gá-güedé, te ni ñà túú xìni ñuhu-xi sá nchòhó taxi-ndo ìⁿ tutú núú càháⁿ-ndó sǎ nchǔhú cúú-ndí cue téé quide váha. ² Te ñá túú xìni ñuhu-xi ducaⁿ cada-ndí. Te cùtnuní ndáá iní-ndí sá nchòhó cúú-ndó dàtná ìⁿ tutú sá ìo váha càháⁿ cuèndá-ndí. Te ducaⁿ sǎtnahá-xi cùu-ndo chi nchaa ñáyiú ñihí-yu tnúhu nàcuáa quide-ndo ndecu-ndo, te xǎⁿ cùtnuní iní-yu sá nchǔhú cúú-ndí cue téé quide váha. ³ Te nchòhó cúú-ndó cuèndá Xítohó Jesucristú, te cùu-ndo datná tutú-gá te tutú-áⁿ ní táuchíuⁿ-gǎ xii-ndí ní cadúha-ndí, te mee-ni ndìhi Espíritú Yá Ndiǒxí ní ngúndeé tnúhu-áⁿ te ñá díú ndìhi tindá ní ngúndeé. Te ñá díú ìⁿ núú yúú ní

ngũndeé chi iní-ndó cùu-xi núú dúcáⁿ nĩ ngũndeé
tnúhu-áⁿ te ducaⁿ sãtnahá-xi cùu-ndo.

⁴ Te duha cãháⁿ-ndí chi cùtnuní ndáá iní-ndí sá
Yã Ndiõxí quidé vãha ñaha-gã xii-ndí, chi ndècu
ndihí-ndí Xítóhó Jesucristú. ⁵ Te nchúhú chi
ndàcu-ndí quidé-ndĩ sá vãha dico ñá díú mèe-ndí
ducaⁿ ndàcu-ndí quidé-ndĩ, chi mee Yã Ndiõxí
chíndèe ñaha-gã xii-ndí nõu ndàcu-ndí quidé-ndĩ sá
vãha. ⁶ Te mee Yã Ndiõxí ní quide-gá sá nchúhú
ndacu-ndí cunu cuechi-ndĩ núú-gã cáháⁿ-ndí núú
ñáyiu cuendá ingá núú sã vãha ní cachí-gá cada
ñaha-gã xií-yu. Te sá vãha ní cachí-gá cada ñaha-gã
xií-yu-áⁿ ñà túú ìⁿ-ni cuu-xi ndihí nchaa tnúhu sá
nĩ xáhaⁿ-gã xii ndíi Moisés ní chídó tnùní ndíi, te
ducaⁿ chi espíritú Yã Ndiõxí néhé chùuⁿ-xi nchaa
tnúhu sá cãháⁿ cuendá nchaa sá vãha-áⁿ. Te nchaa
tnúhu ní chídó tnùní ndíi Moisés, dándixi túu-xi
iní nchaa ñáyiu ndècu ndihí tnúhu-áⁿ sã cuíta ni-
hnú-yu cuendá nchaa cuéchi-yu, dico cue ñáyiu
ndècu ndihí Espíritú Yã Ndiõxí ñáyiu-áⁿ ndécú
ndihí-yu tnúhu ndee iní sá cãcu nihnú-yu.

⁷ Te tnúhu sá nĩ cáháⁿ Yã Ndiõxí ndéé díhna
nàcuáa cada ñáyiu ní ngũndeé-xi ìⁿ núú yúú
quèhéⁿ. Te òré ní dátũu ndíi Moisés nàcuáa cãháⁿ
tnúhu sá nĩ cáháⁿ Yã Ndiõxí ndèé núú yúú-ãⁿ nõú
cuè ñáyiu isràél, te súúni nĩ tásaⁿ núú ndíi te ñá
túú-gã ní cùu cundehé-yu núú ndíi, te ducaⁿ-gã
ducaⁿ-gã quidé-xí datásaⁿ-xi núú ndíi ni cùu ñá
túú-gã ducaⁿ ni quide-xi. Te tnúhu ndèé núú
yúú-ãⁿ dándixi túu-xi iní cue ñáyiu sá cuíta ni-
hnú-yu sá cuendá nchaa cuéchi-yu, te ío váha ní
quide-xi cútnahá ní ngũndecu ndihí cue ñáyiu isràél

tnúhu-án. ⁸ Te sá dúcáⁿ nǐ quide-xi xiáⁿ cútnùní sá tnúhu càháⁿ Espíritú Yá Ndiöxí vitna uuⁿ-gá ducaⁿ ïo-gá váha quide-xi. ⁹ Te núu ducaⁿ ïo váha ní quide-xi cútnàhá ní ngúndecu ndihí cue ñáyiú isràél tnúhu sá dándìxi túu iní-yu sá cuíta nihnú-yu sá cuèndá nchaa cuéchi-yu, te uuⁿ-gá ducaⁿ vǎha quide-xi vitna ní ngúndecu ndihí-o tnúhu sá càháⁿ nàcuáa quide Yá Ndiöxí cuèndá sá vǎ cùndècu-gá cuéchi ñáyiú núú-gǎ. ¹⁰ Te vá càchí-ó sǎ cùtnàhá ní ngúndecu ndihí cue ñáyiú isràél tnúhu ndéé núú yúú-ǎⁿ ïo-gá váha ní quide-xi, te ñáhá chi uuⁿ-gá váha quide-xi vitna cuèndá tnúhu sá càháⁿ nàcuáa quide Yá Ndiöxí. ¹¹ Te núu ducaⁿ ïo váha ní quide-xi cútnàhá ní ngúndecu ndihí ñáyiú isràél tnúhu sá ñà túú ní cùdí, te uuⁿ-gá ducaⁿ ïo váha quide-xi vitna ní ngúndecu ndihí-o tnúhu sá vǎ ndíhí nihnu tnahí-gá.

¹² Te cùtnuní iní-ndí sá vǎ ndíhí nihnu sá dúcáⁿ ïo váha quide-xi, núu xiáⁿ ío vii ío váha cùu iní-ndí càháⁿ-ndí tnúhu sá nǐ ngúndecu ndihí-o. ¹³ Te ñá túú quide-ndí dàtná ní xóo cada ndí Moisés, chi ndí-ǎⁿ nǐ xóo dàdáhu ndí núú ndí òré dátǎsaⁿ-xi núú ndí cuèndá sá vǎ quíni cue ñáyiú isràél òré ñá túú-gǎ dátǎsaⁿ-xi núú ndí. ¹⁴ Te cue ñáyiú isràél ñá túú ní tècú tnùní váha-yu nàcuáa ní xóo danèhé ñáhá ndí Moisés xií-yu, te cuèi ndéé vitna ñá túú tècú tnùní-yu òré dácuàhá-yu tnúhu sá nǐ cáháⁿ Yá Ndiöxí ndéé díhna nàcuáa cada-gá, te cada iní-ó sǎ dàtná sá nǐ xídáhu núú ndí Moisés yídáhu núú-yu cuèndá sá vǎ cútnùní núú-yu cundèhé-yu te tecú tnùní-yu, dico núu tnahá tnúhu-yu ndihí Xítóhó Jesucristú te tecú tnùní-yu. ¹⁵ Te cuèi ndéé vitna

òré dácuàhá-yu nchaa tnúhu sá nǐ chídó tnùnǐ ndíi Moisés nchaa núú tütú ndíi, te cada iní-ó sǎ dàtná sá nǐ xídáhu núú ndíi yídáhu núŷ-yu chi ñá túú tècú tnùnǐ-yu. ¹⁶ Dico cue ñáyiú na tùha ñaha xii Xítohó Jesucrístú te tècú tnùnǐ-yu tnúhu-gá. ¹⁷ Te Xítohó Jesucrístú ìⁿ-ni cùu-gá ndihí Espíritú Yǎ Ndiöxí, te nchaa ñáyiú ndècu ndihí Espíritú-gá ñá túú-gǎ táxí tnùnǐ ñáhá nì ìⁿ sá ñà túú vǎha xií-yu. ¹⁸ Te dàtná cúú ìⁿ yutátá sǎ dánèhé núú ñáhá-xí xii ñáyiú ìⁿ sá vǎha, ducaⁿ sǎtnahá-xi cùu-o chi quide-o nacuaá cáháⁿ ñáyiú sá ìo càhnu cuu Xítohó Jesucrístú, te ducaⁿ ùuⁿ-gá uuⁿ-gá tá cùndáá-ó ndècu-o ichi-gá dàtná quidé mèe-gá quidé ndǎá-gá. Te Espíritú-gá quidé-xí dùcaⁿ ta cundáá-ó núŷ-gǎ cuáháⁿ.

4

¹ Te mee Yǎ Ndiöxí ní cundàhú iní ñáhá-gǎ xii-ndí ní taxi-gá chiúⁿ quide-ndí càháⁿ-ndí tnúhu-gá, núu xǎⁿ ñá túú tnàhí nàtúhú iní-ndí càháⁿ-ndí tnúhu-gá. ² Te nchúhú dàquee tíhú-ndí nchaandi túhú sá ñà túú vǎha quide dayuhu ñáyiú, chi nchaa xǎⁿ cúú-xí ìⁿ sácáⁿnúú sǎ cúú-xí-yu, te nchúhú ñá túú sàni iní-ndí dandàhú-ndí ñáyiú te ni ñǎ túú sàni iní-ndí dama-ndí nàcuáa càháⁿ tnúhu Yá Ndiöxí, chi càháⁿ ndáá-ndí nàcuáa tàú-xi cáháⁿ-ndí, te mee Yǎ Ndiöxí náhá-gǎ nàcuáa ndùu tnúhu càháⁿ-ndí núú ñáyiú, te ñáyiú-áⁿ cùtnùnǐ iní-yu sá nchúhú càháⁿ váha-ndí. ³ Te cue ñáyiú ñá túú tècú tnùnǐ nàcuáa ndùu tnúhu sá càháⁿ nàcuáa naníhí tàhú-ó càháⁿ-ndí núŷ-yu, ñáyiú-áⁿ cúŷ-yu ñáyiú ta xíta nihnu cuáháⁿ. ⁴ Te cue ñáyiú-áⁿ

cúu-yu ñáyiú ío sàá iní-xi chi ñá túú cuení-yu quíndáá iní-yu tnúhu Xítohó Jesucrístú, te xíáⁿ nùu sácúíhná cúnù-xi núu-yu te ñíhí-xi nàcuáa quíde-xi dadáhu ndodo iní ñáhá-xí xii-yu cuendá sá vǎ təcú tnùní-yu tnúhu sá càháⁿ nàcuáa naníhí tàhú-yu, te tnúhu-áⁿ cúu-xí tnúhu sá ïo váha chi càháⁿ-xi sá ïo càhnu cuu Xítohó Jesucrístú, te cùu-gá dàtná mée Tátá-gǎ Dútú Ndiöxí. ⁵ Te nchúhú ñá túú càháⁿ-ndí cuendá sá cúu-xí mée-ndí núu-ndó chi càháⁿ-ndí cuendá Xítohó Jesucrístú, te càchí-ndí xii-ndo sǎ díú-gǎ cúu-gǎ Yaá ío cùnuu, te càchí-ndí xii-ndo sǎ mée-ndí cúu-ndí dìcò-ni cue tée xínu cuechi sá cúu-xí-ndó, te ducaⁿ quíde-ndí nàcuáa cuu vii cuu váha iní Xítohó Jesucrístú. ⁶ Te Yá Ndiöxí Yaá ní dáyèhé ndée cútnàhá nee ñuyíú ní cùu, Yaá-áⁿ ñí cachí-gá sá Xítohó Jesucrístú cada-gá nàcuáa tecú tnùní-ó sǎ ïo càhnu cuu mee Yá Ndiöxí. Te sá dúcáⁿ ñí quíde-gá te cada iní-ó sǎ dàtná tnúhu sá ñí dáyèhé-gá iní-ó.

Ío quíndáá iní-ó Yǎ Ndiöxí

⁷ Te nchúhú ndécú ndíhi-ndí tnúhu Xítohó Jesucrístú, te tnúhu-gá cúu-xí dàtná ïⁿ sá ïo váha ñùhu ïⁿ xítí quídi ñuhu, te nchúhú cúu-ndí dàtná quídi-áⁿ. Te ducaⁿ sǎtnahá-xi cùu-ndí chi tnúhu-gá ío càhnu cuu-xi te mee-ndí ñáhá, te ducaⁿ cùu nàcuáa cutnùní sá mée Yá Ndiöxí quíde-gǎ nchaa sá váha te ñá díú mée-ndí. ⁸ Te cuèi ío ndòho-ndí ndécú-ndí dico ñíhí-ndí nàcuáa quíde-ndí tá yǎha-ndí nchaa tnúndòho-áⁿ cuǎháⁿ, cuèi áma sa ndètu vií-nǎ quehdé iní-ndí sá vǎ ndácú-ndí yǎha-ndí nchaa tnúndòho-áⁿ, dico ndàcu-ndí yǎha-ndí. ⁹ Te cuèi

nànducu ñaha ñáyiu cuìní-yu ná cada ñàhá-yu xii-ndí dico ñá túú dàña ñaha Yá Ndiöxí xii-ndí, te cuëi cànihá-yu xii-ndí dico cǎcu-ndí ñá túú sàhni ñahá-yu. ¹⁰ Te nděni ní cuu cuáháⁿ-ndí xícá cùu-ndí, te cǎcu cǎcu cahni ñàhá-yu xii-ndí dàtná ní quidé-yu Xítohó Jesucristú, te ducaⁿ yǎha-ndí cuendá cutnùní sá ndécú tũu Xítohó Jesucristú andiu te chìndee ñaha-gá xii-ndí. ¹¹ Te nchúhú ñini ndècu-ndí ñuyú-a te nchaa-ni nduu cǎcu cǎcu cahni ñaha ñáyiu xii-ndí sá cuendá Xítohó Jesucristú, te ducaⁿ yǎha-ndí ndécú-ndí cuendá cutnùní sá Xítohó Jesucristú ndécú ndìhì ñaha-gá xii-ndí cuëi vá cúdì yiqui cùñú-ndí cundecu-xi. ¹² Te sá dúcáⁿ cǎcu cǎcu cahni ñaha ñáyiu xii-ndí xǎⁿ nchòhó uuⁿ-gá tá ñihí ndéé-ndó cuáháⁿ ndécú-ndó ìchi Xítohó Jesucristú.

¹³ Te ìⁿ téé ní xíndecu ndéé sanaha ñi chídó tñuní-dé núú tütú Yá Ndiöxí núú cǎchí-xi: “Yúhú ní sándáá iní-í Yá Ndiöxí núu xǎⁿ ní cǎháⁿ-í”, duha ní cǎchí téé-áⁿ. Te dàtná-ni ní sani iní téé-áⁿ ñi cǎháⁿ-dé te ñiu-ni ducaⁿ sàni iní nchúhú tucu núu xǎⁿ cǎchí-ndí: “Sándáá iní-ndí Yá Ndiöxí núu xǎⁿ cǎháⁿ-ndí”, duha cǎchí-ndí. ¹⁴ Te cùtnuní iní-ndí sá núu na cùú-ndí te Yá Ndiöxí dandòto ñaha-gá xii-ndí dàtná ní dándótó-gǎ Xítohó Jesucristú, te tñhá nchòhó ducaⁿ càda ñaha-gá xii-ndo, te dàvá-áⁿ candeca ñaha-gǎ xii-o quǎhíⁿ nucúndecu-o núú-gǎ. ¹⁵ Te nchúhú nándi cùu sá tá yǎha-ndí véxi cuendá nchòhó ngúndecu váha-ndo, te ducaⁿ cuíta cáyá-gá ñáyiu ngúndecu váha sá xí Yá Ndiöxí, te ñiu-ni ducaⁿ cuíta cuu vai-gá ñáyiu ndacáⁿ táhũ-yu

núu-gă te cachí-yu sá ïo cãhnu cuu-gá.

¹⁶ Te xíãⁿ nõu nchúhú ñã túú tnàhí nàtúhú iní-ndí ndécú-ndí ichi Xítohó Jesucristú, te cuèi yiqui cùñú-ndí tá xàú-xi cuáháⁿ dico iní-ndí chi uuⁿ-gá uuⁿ-gá tá nihí ndée-xí cuáháⁿ. ¹⁷ Te nchaa sá ndóhó-ndí ñuyíú-a ñã túú cãchí-ndí sá cúú-xí ìⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí náandi ndòho-ndí ndécú-ndí ñuyíú-a te Yá Ndiõxí ío váha cada ñaha-gă xii-ndí nduu na sàá-ndí núú ndécú-gă, te diu-ni ducaⁿ càda ñaha-gá xii-ndí ni caa ni quíhíⁿ. ¹⁸ Te nchúhú ñã túú nchìcúⁿ nihnu-ndí sá tũu ndèhe-ndí ío ñuyíú-a, chi nchìcúⁿ nihnu-ndí sá vátá quíní-gá-ndí ndécú àndiu, te ducaⁿ quìde-ndí chi nchaa sá tũu ndèhe-ndí ío ñuyíú-a vá cúdĩ-xi cundecu-xi, te nchaa sá ñà túú tũu ndècu andiu xíãⁿ cudí-xi cundecu-xi ni caa ni quíhíⁿ.

5

¹ Te yiqui cùñú-ó cùu-xi datná ìⁿ vehe, te vehe-áⁿ ñà túú cúdĩ-xi, te ducaⁿ sãtnahá-xi cùu yiqui cuñú-ó chi vá cúdĩ-xi, te na sàá nduu vã cúndècu-gá-ó ndìhi yiqui cuñú-ó, te Yá Ndiõxí taxi-gá ìⁿ yiqui cùñú sáá sã cúú-xí-ó, te xíãⁿ cúú-xí dàtná ìⁿ vehe sá ñà túú ní càdúha cue ñáyiu ñuyíú-a, chi mee Yã Ndiõxí ní cadúha-gá vehe-áⁿ te vehe-áⁿ cudí-xi cundecu-xi ni caa ni quíhíⁿ andiu. Te ducaⁿ sãtnahá-xi cùu yiqui cuñú sá táxí Yã Ndiõxí xii-o chi cudí-xi cundecu-xi ni caa ni quíhíⁿ. ² Te nchúhú ndècu ndìhi-gá-ndí yiqui cùñú-ndí sá ndécú ndìhi-ndí vitna te sama cuíní-ndí sá ïo ndìhi

taxi Yă Ndiõxí yiqui cùñú sáá cùndecu ndihi-ndí.
 3 Chi mee-gă vá dáñá-gă sá dúcáⁿ-ní cùnduu-ndí cundecu-ndí, chi dai taxi-gă yiqui cùñú sáá-ăⁿ xii-ndí. 4 Te nini ndècu-ndí ndihi yiqui cùñú-ndí vitna ío sàni iní-ndí te ndìhú iní-ndí, dico ñá díú să dúhá quide-ndí te ñá túú-gă tnàhá iní-ndí cundecu-ndí ndihi yiqui cùñú-ndí, chi cuìní-ndí sá Yă Ndiõxí ío ndìhi taxi-gă yiqui cùñú sáá nduu táhú-ndí, chi xíăⁿ cudíi-xi ni caa ni quíhíⁿ te yiqui cùñú-ndí sá tá ndìhi nihnu cuáháⁿ-a vá cúdji-xi cundecu-xi. 5 Te ducaⁿ tnàhí ní cachí Yă Ndiõxí cunduu sá dúcáⁿ nduu táhú-ó yiqui cuñú sáá-ăⁿ, te ní taxi-gă Espiritú-gă ní ngúndecu ndihi-o cuendá cutnùní iní-ó să ndàá taxi-gă yiqui cùñú sáá-ăⁿ nduu táhú-ó.

6 Te xíăⁿ nũ nchúhú nihí ndéé-ndí ndécú-ndí, te cùtnuní iní-ndí sá nini ndecu-ndí ndihi yiqui cùñú-ndí sá ndécú ndìhi-ndí vitna te vátá sáá-gă-ndí cundecu-ndí mei nũú ndécú Xítohó Jesucrìstú. 7 Te ducaⁿ cùtnuní iní-ndí chi sàndáá iní-ndí Yă Ndiõxí ndécú-ndí ñuyíú-a cuèi ñá túú xìní-ndí-gă. 8 Te ío váha cùu iní-ndí ndécú-ndí, te sàni iní-ndí sá vâha-gă sá nũú vá cùndècu-gă-ndí ndihi yiqui cùñú-ndí sá ndécú ndìhi-ndí vitna. Te ducaⁿ sàni iní-ndí chi váha-gă cundecu-ndí mei nũú ndécú Xítohó Jesucrìstú. 9 Te ío ndùcu ndee-ndí quidé-ndí nàcuáa cuu vii cuu váha iní Xítohó Jesucrìstú vitna ndècu-ndí ñuyíú-a, te dju-ni ducaⁿ càda-ndí cuèi òré vá cùndècu-gă-ndí. 10 Te dacuítíi să ncháá-ó cùndecu-o núú Xítohó

Jesucristú ìⁿ nduu, te dàvá-áⁿ mee-gă cáháⁿ-gá te núu nása ndùu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxí-gă nduu táhú-ó.

Nàcuáa ní cuu ní ngúndecu váha-o ndìhi Yá Ndiöxí

¹¹ Te nchúhú quíyuhú iní-ndí nàcuáa cada Xítohó Jesucristú, núu xíáⁿ càháⁿ-ndí tnúhu-gá núu ñăyiu cuendá xínu iní-yu tuha ñàhá-yu xii-gá. Te mee Yá Ndiöxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùnì iní-ndó nàcuáa quide-ndí ndécú-ndí. ¹² Te sá dúhá càháⁿ-ndí te vá cánì iní-ndó sã nchúhú càháⁿ váha-ndí cuendá-ndí nàcuáa nchòhó cuu váha iní ñàhá-gă-ndó xii-ndí te ñàhá, chi duha càháⁿ-ndí cuendá sá nchòhó níhí-ndó tnúhu cáháⁿ váha-gá-ndó cuendá-ndí núu ñăyiu. Te ducaⁿ ñíhí-ndó tnúhu cúñaha-ndo xii cue ñăyiu quide nínu mee-xi, chi cue ñăyiu-áⁿ ñà túú quide cuendá-yu nása ndècu iní-yu. ¹³ Te núu nchòhó sání iní-ndó sã lúcú-ndí cuendá nàcuáa quide-ndí ndécú-ndí te cùu-xi cuendá Yá Ndiöxí, àdi núu sàni iní-ndó sã ñà túú lúcú-ndí cuendá nàcuáa quide-ndí ndécú-ndí te cùu-xi sá vâha sá cúú-xí-ndó. ¹⁴ Te quide-ndí nàcuáa cuìní Xítohó Jesucristú chi cùtnunì iní-ndí sá ìo cùu iní-gá nchaa ñăyiu, te ducaⁿ xìnì ndáá-ndí sá ñí xíhí-gá cuendá ncháá-yu, te xíáⁿ núu cada iní-ó sã dàtná tnúhu sá ncháá ñăyiu ní xíhí-yu ndìhi-gá. ¹⁵ Te ducaⁿ ñí xíhí Xítohó Jesucristú cuendá nchaa ñăyiu chi cuìní-gá sá ncháá-yu cundecú-yu cadá-yu nàcuáa

cuiní méé-gă te vá cǎdǎ-yu nǎcuáa cuiní méé-yu, chi mee-gă ní xǐhí-gá te ní ndoto-gá cuendá cuu-xi sá vǎha sá cúú-xǐ-yu. ¹⁶ Te xǐǎⁿ nǔu nchúhú ñá túú-gă ná sání ìní-ndí cuendá tnàha ñáyiu-ndí nǔu nàndíhi-yu àdi ñá túú nàndíhi-yu dàtná ní xóo cani iní-ndí cútnàhá ní xíndecu-ndí ichi cuèhé ichi duha, te dàvá-áⁿ nǐ xóo cani iní-ndí cuendá Xítóhó Jesucristú dàtná sání ìní cue ñáyiu ndècu ichi cuehé ichi duha vitna. ¹⁷ Te nchaa nchoo ñáyiu ní tnahá tnúhu ndíhi Xítóhó Jesucristú ní nduu-o dàtná ìⁿ ñáyiu saa, te ducaⁿ chi ñá túú-gă quidé-ó dàtná ní xóo cada-o cǔtnàhá ní xíndecu-o ìchi cuehé ichi duha, chi ní ngúita-o quíde-o mee-ná sá vǎha te nchaa xǐǎⁿ cúú-xǐ sǎ sáá sǎ cúú-xǐ-ó chi vátá quíní-gá-ó cǎda-o.

¹⁸ Te ducaⁿ quíde-o ndecu-o chi mee Yǎ Ndiǒxí quidé-gă sá dúcáⁿ cǎda-o cundecu-o. Te Xítóhó Jesucristú ní quíde-gá ní ngúndecu váha-o ndíhi Yá Ndiǒxí vitna, te ducaⁿ chi mee Yǎ Ndiǒxí ducaⁿ tnàhí ní cachí-gá cunduu, te diu-ni mee Yǎ Ndiǒxí ní taxi-gá chùⁿ quíde-ndí cǎháⁿ-ndí tnúhu-gá nǎcuáa ngúndecu váha cue ñáyiu ndíhi-gá. ¹⁹ Te ducaⁿ chi mee-gă ní cachí-gá sá Xítóhó Jesucristú cada-gá nǎcuáa nucúndecu váha nchaa nchoo cuè ñáyiu ndècu ñuyíú-a ndíhi Yá Ndiǒxí. Te nchaa ñáyiu ní tuha ñaha xì-gá ñá túú-gă sání ìní-gá sá ñáyiu-áⁿ nacháhu-yu cuéchi-yu núú-gă. Te mee Yǎ Ndiǒxí ní taxi-gá chùⁿ quíde-ndí cǎháⁿ-ndí tnúhu-gá núú ñáyiu nǎcuáa ngúndecu ndíhi ñaha vǎha-yu xii-gá. ²⁰ Te Xítóhó Jesucristú ní cachí-gá sá nchúhú cǎháⁿ-ndí tnúhu-gá núú nchàa ñáyiu, te

sá dúhá quide-ndí cãháⁿ-ndí tnúhu-gá te quide-ndí núú Yã Ndiõxí cãháⁿ-ndí yuhu-gá, te xíãⁿ núu cãháⁿ ndàhú-ndí núú-ndó sã tnàhá tnúhu-ndo ndìhi Yá Ndiõxí cuendá cundecu váha-ndo ndìhi-gá, te duha cãháⁿ-ndí chi ducaⁿ cãchí Xítohó Jesucrìstú cada-ndí. ²¹ Te Xítohó Jesucrìstú cúú-gã Yaá ñá túú tnàhí cuéchi-xi, dico Yá Ndiõxí ní quide ñaha-gã xii-gá dàtná ìⁿ ñáyiu ndècu cuéchi-xi, te ducaⁿ chi Xítohó Jesucrìstú ní xido-gá cuéchi nchaa nchoo ñáyiu ñuyúú-a, te ducaⁿ ñí xido Xítohó Jesucrìstú nchaa cuéchi-o cuendá sá núu na tnàhá tnúhu-o ndìhi-gá te cudìu-o núú Yã Ndiõxí, te ducaⁿ ñí cuu chi mee Yã Ndiõxí ducaⁿ ñí cachí-gá cunduu.

6

¹ Te nchoo ìⁿ-ni cùu-o quide chiuⁿ-o cuendá Yã Ndiõxí núu xíãⁿ cãháⁿ ndàhú-ndí núú-ndó sã vã dícó-ni ducaⁿ cùndedóho-ndo tnúhu Yá Ndiõxí, chi cada-ndo nàcuáa na chìndee ñaha-ni-gá. ² Chi mee-gã cãchí-gá ìⁿ xichi núú tütú-gá núú cãchí-xi: Sáá nduu te cundàhú iní ñáhà-í xii-ndo chìndee ñaha-í cuendá naníhí tàhú-ndó, te ní sáá nduu tàú-xi sá cùndàhú iní ñáhà-í xii-ndo chìndee ñaha-í cuendá naníhí tàhú-ndó, núu xíãⁿ ní xìndedóho-í tnúhu ní cãháⁿ-ndó te ní chìndee ñaha-í xii-ndo nàcuáa naníhí tàhú-ndó. Duha cãchí-gá núú tütú-gá. Te vitna cùu-xi nduu cundahú iní ñáhá Yã Ndiõxí chìndèe ñaha-gá, te cùu-xi nduu naníhí tàhú-ó. ³ Te nchúhú ñá túú quide-ndí ìⁿ sá ñà túú tàú-ndí cada-ndí sá cúú-xí ñáyiu, chi cuìní-ndí sá vã cãháⁿ cuèhé-yu cuendá chiuⁿ quide-ndí. ⁴ Te nchaa sá

quidé-ndí cúú-xí nàcuáa cutnùní iní cue ñáyiú sá nchũhú xínú cuèchi-ndí núú Yă Ndiõxí, te ío quide cahnu iní-ndí cuendá nchaa sá ndóhó-ndí, chi nándi quide ñaha ñáyiú xii-ndí, te ducaⁿ-ni ta quide cahnu iní-ndí cuèi nándi-gá nchaa sá tá yăha-ndí véxi. ⁵ Te duha ta yăha-ndí véxi, núú cáníha ñáyiú xii-ndí, núú chíhí ñàhá-yu vecaá, núú cuàá ndeé ñàhá ñáyiú xii-ndí xícuèhé ñàhá-yu, te ío ndòho-ndí quidé-ndí chiúⁿ Yă Ndiõxí, te áma xídí-ndí te áma ñá túú xídí-ndí, te áma ñihí-ndí sá xéxí-ndí te áma ñá túú ñihí-ndí. ⁶ Te quide ndáá-ndí ndécú-ndí, te cùtnuní váha iní-ndí nàcuáa càháⁿ tnúhu Yă Ndiõxí, te quide cahnu iní-ndí cuèi nándi quide ñaha ñáyiú xii-ndí, te cùndahú iní-ndí tnàha ñáyiú-ndí, te quide-ndí nchaa sá vâha nàcuáa chindee ñaha Espíritú Yă Ndiõxí xii-ndí, te ío ndisa iní-ndí cúú ñihí-ndí cue tnàha ñáyiú-ndí. ⁷ Te dànehé-ndí ñáyiú mee-ni tnũhu ndáá, te nchaa chiúⁿ quide-ndí te quide-ndí nàcuáa chindee ñaha Yă Ndiõxí xii-ndí, te cuendá sá quidé ndáá-ndí ndécú-ndí nõu xíãⁿ ñihí ndéé-ndí dáquèe tíhú-ndí nchaa sá cuèhé sá dúhá. ⁸ Te dava ñáyiú quide nínu ñàhá-yu xii-ndí, te davá-yu tnúhu cuèhé tnúhu duha càháⁿ-yu xăhăⁿ-yu xii-ndí, te davá-yu xícáháⁿ váha-yu cuendá-ndí te davá-yu xícáháⁿ cuèhé-yu, te davá-yu càchí-yu sá dándàhú-ndí ñáyiú dico ñá ndáá chi càháⁿ ndáá-ndí. ⁹ Te davá-yu càchí-yu sá ñà túú xíní-yu ná ñáyiú cùu-ndí, te davá-yu càchí-yu sá xíní-yu yoo cùu-ndí, te davá-yu

cuiní-yu cahni ñàhá-yu xii-ndí dico vátá cáhni ñàha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiõxí, te cuèi ndòho-ndí dico ñá túú cùu-xi sá cùú-ndí. ¹⁰ Te cuèi ndìhú iní-ndí dico ñá túú dàña ndeé-ndí sá cùú-ndí ìní-ndí, te cùu-ndí cue téé ndàhú dico sànu ichi-ndí vài ñáyiu ichi Yá Ndiõxí cuèndá ngúndecu váha-yu sá cuèndá-gá, te cuèi ñá túú ñá ndécú ndìhi-ndí dico ñá túú ñá cúmání xii-ndí.

¹¹ Te nchòhó ñáyiu ndècu ndìhi-í ichi Xítóhó Jesucristú ndécú ñúú Còrintú ío cùu iní ñàhá-ndí xii-ndo, te ñi yùhu ñi iní-ndí càháⁿ-ndí nchaa tnúhu càháⁿ-ndí sá cùú-xí-ndó. ¹² Te nchúhú chi ñi yùhu ñi iní-ndí cùú ìní ñàhá-ndí xii-ndo, dico nchòhó chi ñá túú dùcaⁿ quide-ndo sá cùú-xí-ndí. ¹³ Te yúhú càháⁿ ndàhú-í núú-ndó dàtná quidé ìⁿ téé cùu tátá òré càháⁿ ndìhi-dé cue déhe-dé sá ñi yuhu ñi iní-ndó cùu iní ñàhá-ndó xì-ndí dàtná quidé mèe-ndí cùú ìní ñàhá-ndí xii-ndo.

Nchoo cùu-o datná ìⁿ vehe Yá Ndiõxí

¹⁴ Te cue ñáyiu ñá túú sàndáá iní tnúhu Xítóhó Jesucristú, te vá cùú ìⁿnuu-ndo ndìhí-yu cada-ndo dàtná xíquidé-yu, chi dèⁿ cuu nchaa sá vǎha te dèⁿ cuu nchaa sá cuèhé sá dúhá, te ñúmí nchícanhii ndìhi niú chi ñá túú ìⁿ-ni cuu-xi. Te ducaⁿ sǎtnhá-xi cùu nchaa sá vǎha ndìhi nchaa sá cuèhé sá dúhá chi ñá túú ìⁿ-ni cuu-xi. ¹⁵ Te dèu-ni ducaⁿ ñá túú ìⁿ-ni cuu Xítóhó Jesucristú ndìhi sácúhna, te dèu-ni ducaⁿ ñá túú ìⁿ-ni cuu ñáyiu sàndáá iní ñàhá xì Xítóhó Jesucristú ndìhi ñáyiu ñá túú sàndáá iní ñàhá xì-gá. ¹⁶ Te dèu-ni ducaⁿ sǎtnhá tucu-xi

cùu vehe Yá Ndiöxí ndihí nchaa sá cächí ñáyiú cùu ndióxí ní cadúha cue téé ñuyíú-a, chi vá cúú quíhi ni ñⁿ xíáⁿ xítí vehe-gá. Te nchoo cùu-o datná vehe Yá Ndiöxí Yaá ndécú túu andiu, chi mee-gã cächí-gá núú tütú-gá núú cächí-xi:

Yúhú vá cúmăní cundecu-í ndihí-yu ndëni ní cuu na cundecú-yu,

te ðiu-ni yúhú cuu-í Ndiöxí-yu,

te mée-yu cuú-yu ñáyiú cùu cuendá-í.

Duha cächí-gá núú tütú-gá. ¹⁷ Te xíáⁿ nñu cächí tucu-gá ingá xichi núú tütú-gá núú cächí-xi:

Chí tá quèe tnuú nchaa ñáyiú ñá túú sàndáá iní ñáhá xii-í,

te vá cání ìní-ndó càda-ndo ni ñⁿ sá cuèhé sá dúhá,

te ducaⁿ te queheⁿ cuèndá ñáhà-í xii-ndo,

¹⁸ te yúhú cuu-í Tătá-ndó,

te nchòhó cuu-ndo cuè déhe ducuⁿ-í, ndihí cue déhe yoco-í,

duha cáháⁿ yúhú Yaá ío cànnyu cuu.

Duha cächí-gá núú tütú-gá.

7

¹ Te sá dúcáⁿ ïo váha cáháⁿ Yă Ndiöxí sá cúú-xí-ó nñu xíáⁿ cáháⁿ-í dóho nchòhó ñáyiú ío cùu iní-í sá dùuⁿ duuⁿ dañ-a-o nchaa sá cuèhé sá dúhá, chi nchaa xíáⁿ ñá túú cùu-xi sá vâha sá cúú-xí ìní-ó ndihí yiqui cuñú-ó, te cada-o nâcuáa tàú-xi cunduú nâcuáa cundáá-ó núú Yă Ndiöxí, te cada-o sã néhé-ó sã yíñùhu núú-gã.

Cue ñáyiú ñuú Còrintú quidé vâha-yu

² Te ni yùhu ni iní-ndó chì cúú ìní ñáhá xii-ndí, chi nchúhú vá yõo ñⁿ quide úhú iní-ndí, te ni vâ yõo

ɨⁿ dàcuíta nihnu-ndí, te ni vǎ yõ ɨⁿ dàndahú-ndí.
 3 Te sá dúhá càháⁿ-í te vá cání ìní-ndó sǎ ɨⁿ cuéchi
 dàcaa-í díquí-ndó, chi dàtná sa ní cachí-í xii-ndo
 sǎ yǔhú ío cùu iní ñáhà-í xii-ndo, te cuèi vitna
 ndècu-gá-ó ñùyíú-a àdi cuèi na cùú-ó dico ðiu-ni
 ducaⁿ cùu iní ñáhà-í xii-ndo. 4 Te yúhú ío váha
 sàni iní-í cuendá-ndó, te ducaⁿ ïo váha càháⁿ-í
 cuendá-ndó, te ío ndècu ndihí-í tnúhu ndee ìní
 cuendá-ndó, te ío cùdí ìní-í sá cuendá-ndó cuèi
 nándi ndòho-í ndihí dava-gá-güedé ndécú-ndí.

5 Te nchúhú cútnàhá ní sáháⁿ-ndí distritú
 Macèdoniá, te ñá túú tnàhí ni ndètátú-ndí cuendá
 nchaa sá ñ yáhandi chi ío ní ndoho-ndí cuendá
 nchaa sá ñ quidé-yu, chi ío ní cuándeé ñáhǎ-yu
 xii-ndí, te ío ní sani iní-ndí nùu nása-gá yáha-ndí
 ní cùu. 6 Dico Yá Ndiõxí ní taxi-gá tnúhu ndee ìní
 xii-ndí òré ní quexìo té Títú núú ndécú-ndí, te
 ðiu-ni Yaa-áⁿ cùú-gǎ Yaa sǎñaha-gǎ tnúhu ndee
 ìní xii cue ñáyiu ndíhú iní-xi. 7 Te ducaⁿ ñ taxi
 Yá Ndiõxí tnúhu ndee ìní xii-ndí cuendá sá ñ
 quexìo té Títú núú ndécú-ndí, te ñá díú-ní sǎ
 cuendá ní quexìo-dé chi ní níhí tucu-ndí tnúhu
 ndee ìní cuendá ní cani-dé cuendú núú-ndí sá
 nchòhó ní sǎñaha-ndo tnúhu ndee ìní xii-dé, te
 ní cachí tnúhu-dé xii-ndí sá nchòhó ío cuení-ndó
 càháⁿ ndihí ñaha-ndo xii-ndí, te ní cachí tnúhu
 tucu-dé xii-ndí sá nchòhó ío ndíhú iní-ndó cuendá
 nàcuáa cùu ndecu-ndo ni cuu, ndihí cuendá sá ïo
 sàni iní-ndó cuendá-í, te sá dúcáⁿ ndùu cuendú ní
 cani-dé núú-ndí nùu xíⁿ ío ní cudí ìní-í.

8 Te nchòhó ní ndíhú iní-ndó cuendá tnúhu
 càháⁿ-í núú tütú sá ñ dáquíxì-í ndaha-ndo, te òré

ní níhì-í tnúhu sá ndìhú iní-ndó te tnaa-ni ní ndixi
 cuéchi iní-í sá dúcáⁿ nǐ quide-í te dǎtnùní ñá túú-gǎ
 ní ndixi cuéchi iní-í. ⁹ Te vitna ní ndìhú iní-ndó, te
 xǎⁿ ní quide-xi ní ndixi cuéchi iní-ndó sǎ ñà túú
 quide váha-ndo ndècu-ndo ni cuu, te ní cudíí iní-í
 dico ñá díú cuendá sá nǐ ndìhú iní-ndó nǐ cudíí
 iní-í chi cuendá sá nǐ ndixi cuéchi iní-ndó, te ní
 ndìhú iní-ndó nàcuáa ní cuu váha iní Yǎ Ndiöxí,
 te xǎⁿ nǔu ní cuu-xi ìⁿ sá vǎha sá cúú-xí-ndó
 cuendá tnúhu ní cáháⁿ-í te ñá túú ní cùu-xi ìⁿ sá
 cuèhé sá cúú-xí-ndó. ¹⁰ Te nchoo nǔu na ndìhú
 iní-ó nàcuáa cuu váha iní Yǎ Ndiöxí, te ndixi cuéchi
 iní-ó te nǔu ñá túú quide váha-o ndècu-o, te sá
 dúcáⁿ quide-o te nàníhí tàhú-ó, te vá ndìhú iní-ó sǎ
 dúcáⁿ nǐ quide-o, te dava ñáyiu xǐndecu ichi cuèhé
 ichi duha ndìhú iní-yu dico ñá túú ndixi cuéchi
 iní-yu cuendá nchaa sá ñà túú vǎha quidé-yu, te
 sá dúcáⁿ quidé-yu te cuíta nihnú-yu. ¹¹ Te sá dúcáⁿ
 nǐ ndìhú iní-ndó nàcuáa ní cuu váha iní Yǎ Ndiöxí,
 te xǎⁿ nǔu ndùcu ndee-ndo quide-ndo nchaa
 nacuáa tàú-xi cunduu, te vitna nǐ yùhu nǐ iní-ndó
 càháⁿ-ndó sǎ quidé vǎha-ndo, te ío cùdééⁿ-ndó nǔú
 méé-ndó sǎ ñà túú quide váha-ndo ndècu-ndo ni
 cuu, te yùhú-ndó ndècu-ndo cuendá sá ñà túú
 quide váha-ndo ni cùu, te ío ní xúhuⁿ iní ñáhá-ndó
 xǐ-í, te ní ndúcú ndéé-ndó nǐ quide ndáá-ndó
 cuendá téé ndècuéchi ndècu ndìhí-ndo, te sá dúcáⁿ
 nǐ quide-ndo te xǎⁿ ní cutnùní sá méé-ndó ñà
 túú cuéchi-ndo. ¹² Te ní cadúha-í tutú ní dáquíxì-í
 ndaha-ndo, te ní quide-ndo nàcuáa ní cáháⁿ-í, te
 sá dúcáⁿ nǐ quide-ndo xǎⁿ ní cutnùní iní-ndó sǎ
 ïo cùu iní ñáhá-ndó xǐ-í. Te Yá Ndiöxí náhá-gǎ
 sá díú cuendá xǎⁿ ní dáquíxì-í tutú ndaha-ndo, te

ñá díú-ní cuendá sá sání ìní-í cuendá té ndècuéchi ndècu ndìhi-ndo, te ni ñà díú-ní cuendá ñáyiú ní dándìhú té ndècuéchi-áⁿ iní-xi ní càdúha-í tutú ní dáquíxi-í ndaha-ndo. ¹³ Te cuendá sá quidé vâha-ndo ndècu-ndo xǎⁿ cúú-xí tnùhu ndee ìní ndécú ndìhi-ndí.

Dico ñá díú-ní xǎⁿ chi tnàhá ío cùdíí ìní-ndí cuendá sá ío cùdíí ìní té Títú, te ducaⁿ cùdíí ìní-dé chi nchòhó ní sáñaha-ndo tnùhu ndee ìní xii-dé. ¹⁴ Te yúhú ñá túú cùcahaⁿ núú-í sá nì cáháⁿ váha-í cuendá-ndó núú tē Títú cútnàhá vátá quíxí-gǎ-dé núú ndécú-ndó, chi ní cutnùnì iní-dé sá ndàá càháⁿ váha-í nàcuáa quide-ndo datná cúú-xí sǎ ndàá nchaa tnùhu dàcuaha ñaha-í xii-ndo. ¹⁵ Te vitna ío-gá váha cùu ìní té Títú cuendá-ndó, chi ndàcu ìní-dé sá ncháá-ndó ío váha ní tñi-ndo nchàa tnùhu ní cáháⁿ-dé núú-ndó, te ndàcu tucu ìní-dé sá nǐ queheⁿ cuendá váha-ndo-dě, te ní dátùu-ndo núú-dě sá ío ní quiyùhú ìní-ndó sǎ vǎ ndácú-ndó càda-ndo nchaa nacuáa tàú-xi cunduu. ¹⁶ Te ío cùdíí ìní-í cuendá-ndó chi cùtnunì ndáá ìní-í sá ñà túú dàña ndeé-ndó quide-ndo nchaa nacuáa tàú-xi cunduu.

8

Ío váha cuu ìní-ó chìndee tnaha-o

¹ Te nchòhó ñáyiú ndècu ndìhi-ndí ichi Xítóhó Jesucristú càchí tnùhu-ndí xii-ndo nàcuáa quide ñaha Yá Ndiõxí xii cue ñáyiú xǎndecu ichi-gá ndécú dìstrítú Macèdoniá, chi ío chìndee ñaha-gá xii-yu cuendá sá quidé vâha-yu ndécú-yu. ² Te cuéi ndòho vihí-yu ndécú-yu dico ío-ni cùdíí ìní-yu, te cuendá xǎⁿ núu nǐ yùhu nǐ ìní-yu ní sacáⁿ tnáhǎ-yu díhúⁿ

să cúú-xí tnàha ñáyíú-yu, te ñá túú tnàhí ni xĩnduu díi-yu cuèi ío ndàhú-yu. ³ Te ñá díú-ní nàcuáa ní sani iní-yu ndacú-yu cacáⁿ tnáhă-yu, chi ní quide yica iní-yu ní sacáⁿ tnáhá-gă-yu, te yúhú càchí tnúhu ndáá-í xii-ndo să ñi yuhu ñi iní-yu ducaⁿ ñi quidé-yu. ⁴ Te ío ní cáháⁿ ndàhú-yu núú-ndĩ cuendá sá cuăha-ndĩ tnúhu sá tnáhá-yu chindèé-yu dava-gá cue ñáyíu cùu cuendá Yă Ndiöxí. ⁵ Te ñá díú-ní nàcuáa ní sani iní-ndĩ ní quidé-yu, chi ní xídó-gă-yu ní quide váha-yu, te ducaⁿ chi mèé-yu ní sani iní-yu sá cáďă-yu nchaa nàcuáa cuiní Yă Ndiöxí, te dătnùnı ducaⁿ te ní cachı-yu sá cúú căďă-yu nchaa nàcuáa na cŭñaha-ndĩ xiı-yu. Te ducaⁿ ñi quidé-yu chi ducaⁿ ñi cuinı mée Yă Ndiöxı cunduu. ⁶ Te sá dúcáⁿ ñi quide ñáyíu-áⁿ nŭu xiăⁿ căháⁿ ndàhú-ndĩ núú tĕ Tıtú sá quıxı tucu-dé núú ndécú-ndó cuendá dăxınu cava-dé chiúⁿ sá sá ní ngŭıta-dé quıde-dĕ dătăcă-dé dıhúⁿ să sá ní ngŭıta-ndo săcáⁿ tnáhá-ndó, te ducaⁿ quide-ndo chi cundahú inı-ndó tnàha ñáyíu-ndo. ⁷ Te nchòhó cúú-ndó ñáyíu ío ngòdónúú quide nchaa sá văha, te ío váha sàndáá inı-ndó Xıtohó Jesucrıstú, te ío váha cŭtnunı inı-ndó nàcuáa căháⁿ tnúhu-gá, te ío váha dăcuaha-ndo ñáyíu tnúhu-gá, te ío ndŭcu ndee-ndo quide-ndo mee-ñi sá văha, te ducaⁿ űo cùu inı ñáhá-ndó xı-ndĩ, te sá dúcáⁿ quide-ndo núu xiăⁿ căháⁿ ndàhú-ı núú-ndó să ngòdó núú-gă-ndó căďă-ndo sá cúú-xı tnàha ñáyíu-ndo.

⁸ Dico yúhú ñá túú tàuchiúⁿ-ı sá dúcáⁿ căďă-ndo, chi cuendá-ñi sá căchı tnúhu-ı xii-ndo nàcuáa quide dava-gá cue ñáyíu ndĕcu ichi Xıtohó Jesucrıstú,

chi cue ñáyiú-áⁿ ni yùhu ni iní-yu quidé-yu sá vâha sá cúú-xí tnâha ñáyiú-yu, te câchí tnúhu-í xii-ndo nâcuáa quidé-yu cuendá cutnùní nûu nása cada-ndo nûu ndisa sá cúú iní-ndó cuè tnaha ñáyiú-ndo. ⁹ Te nchòhó sa xini-ndó sã Xitohó Jesucristú ío cùndahú iní ñáhá-gã xii-o, te ío váha ndècu-gá ní cùu te ní quixi-gá ñuyíú-a ní guide váha ñaha-gã xii-o, te ñuyíú-a ñá túú ní xĩndecu váha-gá, te ducaⁿ ñi quixi-gá ñuyíú-a cuèi ñá túú ní xĩndecu váha-gá cuendá sá nchóó ngũndecu váha-o nûú ndécú-gã.

¹⁰ Te na câchí tnúhu-í xii-ndo nâcuáa sâni iní-í. Chìuⁿ sá ñi yuhu ni iní-ndó ñi ngũíta-ndo quide-ndo cuía ñi yâha chi cùu-xi sá vâha sá cúú-xí-ndó nûu na dàxínu cava-ndo. ¹¹ Te dàtná-ni ni yùhu ni iní-ndó ñi tausaha-ndo chìuⁿ-áⁿ te ducaⁿ-ni ñi yuhu ni iní-ndó dàxínu cava-ndo, te cacáⁿ tnáhá-ndó sã ndécú ndihí-ndo nacuéa xito mee-ndo ndacu-ndo. ¹² Te nûu nchòhó ni yùhu ni iní-ndó càcáⁿ tnáhá-ndó sã xító mèe-ndo ndacu-ndo ña, te cùu váha iní Yã Ndiõxí, chi mee-gã sa nâha-gá nása ndècu-o te ndùu vétú-ni iní-gá.

¹³ Te sá dúhá ndùu tnúhu càháⁿ-í te vá cání iní-ndó sã yùhú cuiní-í sá nchòhó ndoho-ndo cùndecu-ndo te dava-gá-yu ngũndecu váha-yu sá cuendá-ndó. ¹⁴ Te vitna ndècu ndee iní-ndó nâcuáa ndacu-ndo chĩndee-ndo cue ñáyiú xini ñuhu, te nduu ña túú ndècu ndee iní-ndó te cue ñáyiú-áⁿ chĩndee ñáhá-yu xii-ndo te núu ndècu ndee iní-yu, te ducaⁿ te ñi nchòhó ñá túú ña cumání xii-ndo te ñi cuè ñáyiú-áⁿ ñá túú ña cumání xií-yu. ¹⁵ Te ducaⁿ te quee ndáá-xi nâcuáa càháⁿ-xi núú tûtú Yã Ndiõxí núú câchí-xi: “Cue ñáyiú ío vai sá ni ñihí ñá túú ní

cùu sobrá xií-yu, te cue ñáyiú sacú ní níhí ñá túú ní cùmání xií-yu”, duha càchí-xi núú tùtú-gá.

Té Títú ndihí cue té cùndihí-dé

¹⁶ Te ndàcáⁿ táhù-í núú Yă Ndiöxí chi mee-gă ní quide sá tē Títú ío ñùhu iní ñáhá-dě xii-ndo dàtná ñùhú iní ñáhà-í xii-ndo. ¹⁷ Te yúhú ní xáhaⁿ-í xii-dé sá quíxí còto ñaha-dé xii-ndo te ní sáha-dé tnúhu, te ñá díú mèe-ni sá dúcáⁿ ñí xáhaⁿ-í xii-dé quixi coto ñaha-dě xii-ndo, chi mee-dě cúdǎ^í tnàhí iní-dé quixi coto ñaha-dě xii-ndo.

¹⁸ Te tendaha-ndǎ^í ñⁿ tée ndècu ndihí-o ichi Xítohó Jesucristú quixi-dé ndihí té Títú, te tée quixi ndihí té Títú-áⁿ cúú-dě ñⁿ tée ío váha càháⁿ cue ñáyiú xǎndecu ichi Xítohó Jesucristú cuendá-dé cuendá sá ïo váha quide-dé chùⁿ Xítohó Jesucristú càháⁿ-dé tnúhu-gá tnúhu sá càháⁿ nàcuáa naníhí tǎhú-ó. ¹⁹ Te cue ñáyiú xǎndecu ichi Xítohó Jesucristú ñá díú-ní sǎ càháⁿ váha-yu cuendá-dé, chí tnàhá ní cáxi ñáhá-yu xii-dé cuendá sá cáca cùu ndihí ñaha-dé xii-ndí chindee ñaha-dé tacá sá cúú-xí ñáyiú ndàhú, te quide-ndí chùⁿ-a cuendá ío cuu càhnu Yă Ndiöxí, te cue ñáyiú cutnùní iní-yu sá nchòhó ñí yùhu ñí iní-ndó quide-ndo nchaa sá vǎha sá cúú-xí cuè tnaha ñáyiú-ndo. ²⁰ Te cuení-ndí sá vǎ càháⁿ cuèhé ñáyiú cuendá nàcuáa quide-ndí ndihí sá ngǎutnàha sá cúú-xí cuè tnaha ñáyiú-o, te ío vǎi cuu-xi. ²¹ Chi ndùcu ndee-ndí quidé-ndǎ^í nàcuáa cáháⁿ váha Xítohó Jesucristú cuendá-ndí, te quide tucu-ndí nàcuáa cáháⁿ váha ñáyiú sá quidé vǎha-ndí.

²² Te tendaha tùcu-ndí ingá tucu tée ndècu ndihí-o ichi Xítohó Jesucristú quixi-dé ndihí

cue téé úú quixi coto ñaha xii-ndo, te téé quixi ndihí-güedé-áⁿ ñí cuu vai xito quide-dé nàcuáa cutnùní iní-ndí sá ïo ndùcu ndee-dé quidé-dě sá vǎha, te vitna ío-gá cuìní-dé cada-dé sá vǎha vitna quixi-dé núú ndécú-ndó, chí cùtnuní ndáá iní-dé sá cúú-ndó cuè ñáyiú quide váha. ²³ Te cǎchí tnúhu-í xii-ndo sǎ tǎ Títú cúú-dě ñⁿ téé cùndihí-í quidé-ndí chiuⁿ Xítóhó Jesucrístú, te tnàhá-dé cúú-dě ñⁿ téé xínu cuechi núú-ndó cǎháⁿ-dé tnúhu-gá. Te cǎchí tnúhu tucu-í xii-ndo cuèndá cue téé úú quixi ndihí-dé, chí cue téé-áⁿ cúú-güedě cue téé tendaha cuè ñáyiú xǐndecu ichi Xítóhó Jesucrístú quixi coto ñaha xii-ndo. Te cue téé-áⁿ quidé-güedě nàcuáa cachí ñáyiú sá ïo cǎhnu cuu Xítóhó Jesucrístú. ²⁴ Te chí cǎdá sǎ cúú iní ndisa-ndo-güedě cuèndá ducaⁿ na cùtnuní iní nchaa dava-gá ñáyiú xǐndecu ichi Xítóhó Jesucrístú sá ndáá ndisa ducaⁿ quide-ndo, te ducaⁿ cùtnuní iní-yu sá ndáá ndisa quide váha-ndo dàtná cǎháⁿ-ndí cuèndá-ndó sǎ quidé vǎha-ndo.

9

Cuèndá sá ngǎutnàha sá cúú-xí cuè ñáyiú xǐndecu ichi Xítóhó Jesucrístú

¹ Te cuèndá sá ngǎutnàha sá cúú-xí cuè ñáyiú ndècu ichi Xítóhó Jesucrístú ñǎ túú-gǎ xíní ñùhu-xi cachí tnúhu-í xii-ndo nǔú tütú-a nàcuáa cada-ndo, ² chí sa cùtnuní iní-í sá ïo cuìní-ndó chǐndee-ndó-yu. Te ducaⁿ-ni ïo váha cǎháⁿ-í cuèndá-ndó nǔú ñáyiú xǐndecu ichi Xítóhó Jesucrístú ndécú dìstrítú Macèdoniá, te xǎhaⁿ-í xii-yu sá nchòhó ñáyiú xǐndecu ichi Xítóhó Jesucrístú ndécú dìstrítú Acáyá sa ní cuu ñⁿ cuíá ducaⁿ cuìní-ndó cǎcáⁿ tnàhá-ndó

să cúu-xí cuè ñáyiú ndàhú ndécú ìchi-gá. Te vài cue ñáyiú distritú Macèdoniá cuìní-yu cacáⁿ tnáhă-yu sá cúu-xí cuè ñáyiú ndàhú ndécú ìchi Xítóhó Jesucristú cuèndá sá nĩ níhĩ-yu tnúhu sá nchòhó ío cuìní-ndó dùcaⁿ cada-ndo. ³ Te cuèndá sá sání iní-ndó càda-ndo xíăⁿ tendaha-ĩ cue téé ndècu ndihí-o ichi Xítóhó Jesucristú quixi-güedé núú ndécú-ndó cuèndá dātúha ñaha-güedé xii-ndo, cuèndá sá vǎ quée ndèhnde-í núú ñáyiú sá nĩ cáháⁿ váha-í cuèndá-ndó, te ducaⁿ cùndecu túha ndisa-ndo dàtná sa ní cáháⁿ-í núú-yu. ⁴ Chi na cuáháⁿ ndèé quixi-í ndihí ìⁿ ũú cue ñáyiú distritú Macèdoniá núú ndécú-ndó te quiní-yu sá ñà túú ndècu túha-ndo, te cucahaⁿ núú-í núú-yu sá nĩ cáháⁿ váha-í cuèndá-ndó te núú ñà túú ndècu túha-ndo, te tnáhá-ndó cùcahaⁿ núú-ndó. ⁵ Te xíăⁿ nũ ní sani iní-í sá vǎha-gá codonũu cue téé ndècu ndihí-o ichi Xítóhó Jesucristú quixi coto ñaha-güedé xii-ndo cuèndá chindee ñaha-güedé tacá sá nĩ sani iní-ndó càcáⁿ tnáhá-ndó cuèndá sá cùndècu túha-xi, te cuu-xi dàtná ìⁿ táhú sǎ nĩ quene cuu iní méé-ndó càcáⁿ tnáhá-ndó sǎ cúu-xí cuè tnaha ñáyiú-ndo. Te ducaⁿ te vǎ yõo caní iní-xi quesàhá-yu sá nchũhú ní quide yica-ndĩ ducaⁿ nĩ sacáⁿ tnáhá-ndó.

⁶ Te nchòhó sa xìní-ndó sǎ ñáyiú na chĩhi vai tatá te vài níhĩ-yu cùu, te cue ñáyiú na chĩhi sacú tatá te sacú níhĩ-yu cùu. Ducaⁿ sǎtnahá-xi cùu ñáyiú sàcáⁿ tnáhá sǎ cúu-xí tnàha ñáyiú-yu. ⁷ Te ìⁿ ìⁿ-ndo càcáⁿ tnáhá-ndó nàcuáa quène cuu iní méé-ndó, te ío váha cuu iní-ndó dùcaⁿ cada-ndo te vǎ cádá-ndó cuèndá-ni sá quidé yica ñaha ñáyiú xii-ndo, chi Yá Ndiõxí cúu vǎha iní-gá núú nchàa

ñáyiú cùdíí ìní sàcáⁿ tnáhá sǎ cúú-xí cuè tnaħa ñáyiú-xi. ⁸ Te Yá Ndiǒxí ndacu-gá chindee ñàħa-gá xii-ndo nàcuáa cundecu váħa-ndo, chi ðiu-gá cada te ñíhí-ndó nchàa núú sǎ xíní ñùhu-ndo cundecu ndihí-ndo, te ñá túú tnàhí-gá ná cumání xii-ndo, te mee-gǎ chindee ñàħa-gá xii-ndo ñíhí-ndó ïo vǎi cundecu ndihí-ndo cuendá ducaⁿ chindee-ndo cue tnaħa ñáyiú-ndo. ⁹ Te núú tütú Yá Ndiǒxí càchí-xi ìⁿ xichi:

Ìⁿ ñáyiú ïo vǎi sǎ ñí sǎñàħá-yu xii ñáyiú ndàhú, te sǎ ñí quide ñáyiú-áⁿ ñí cuu-xi sǎ vǎħa sǎ vǎ yǒo cùnaa.

Duħa càchí-xi núú tütú-gá. ¹⁰ Te mee Yá Ndiǒxí táxí-gǎ nchaa sǎ cúú tàtá nchaa nchòhó ñáyiú xítu nándí sǎ xítú cuendá cuu sǎ cúú nchìto-ndo, te ðiu-gá cada te ïo vǎi sǎ ñíhí-ndó cundecu ndihí-ndo, te ducaⁿ ïo-gá vǎi sǎ vǎħa cada-ndo sǎ cúú-xí cuè tnaħa ñáyiú-ndo. ¹¹ Te Yá Ndiǒxí taxi-gá vǎi núú sǎ cùndècu ndihí-ndo cuendá ducaⁿ ñí yuhu ñí ìní-ndó vǎi cuáñaha-ndo sǎ cúú-xí tnàħa ñáyiú-ndo. Te cuendá nchaa sǎ sàcáⁿ tnáhá-ndó quèheⁿ cuendá-ndí cuu xii tnàħa ñáyiú-ndo, te cue ñáyiú-áⁿ ïo ndacáⁿ táhǔ-yu núú Yá Ndiǒxí cuendá sǎ dúcáⁿ sàcáⁿ tnáhá-ndó sǎ cúú-xí-yu. ¹² Te sǎ dúcáⁿ quide-ndo sacáⁿ tnáhá-ndó sǎ cúú-xí cuè ñáyiú cùu cuendá Yá Ndiǒxí, te ñáyiú-áⁿ ñà túú-gǎ ná cumání xíí-yu, te ïo ndacáⁿ táhǔ-yu núú Yá Ndiǒxí sǎ dúcáⁿ quide-ndo. ¹³ Te ñáyiú-áⁿ cutnùní ìní-yu sǎ nchòhó quidé-ndó sǎ sàndáa ndisa ìní-ndó tnùhu Xítóhó Jesucrístú, te cuendá xíáⁿ te ñáyiú-áⁿ chiñùhú-yu Yá Ndiǒxí, te cuendá sǎ dúcáⁿ ñí yuhu ñí ìní-ndó sàcáⁿ tnáhá-ndó sǎ cúú-xí-yu ndihí sǎ cúú-xí nchàa dava-gá ñáyiú,

te cachí-yu sá ïo càhnu cuu Yá Ndiöxí. ¹⁴ Te ñáyi-u-áⁿ cãháⁿ ndihí-yu Yá Ndiöxí cuendá-ndó, te ío cuu váha iní ñáhã-yu xii-ndo cuendá sá Yã Ndiöxí chindèe ñaha-gá xii-ndo quide-ndo sá vãha sá cúu-xí-yu ndihí dava-gá ñáyi-u. ¹⁵ Te ío ndàcáⁿ táhú-ó nõú Yã Ndiöxí cuendá sá ñí taxi-gá sá ïo váha ndècu ndihí-o, te ni ñã cútñuní iní-ó nãsa cunduu tnúhu cáháⁿ-ó cuendá sá vãha ní taxi-gá.

10

Té Pãblú ndécú ndihí-dé tnúhu ndee iní sá càháⁿ-dé tnúhu Xítoho Jesucristú

¹ Te Xítoho Jesucristú ío càhnu iní-gá, te cundahú iní ñáhã-gã xii-o chindèe ñaha-gá, núu xíãⁿ yúhú té Pãblú ducaⁿ quide-í càháⁿ ndàhú-í núu-ndó nàcuáa cada-ndo. Te dava-ndo càchí-ndó sã yũhú ío ndàhú iní-í òré ndécú ndihí ñaha-í xii-ndo, te òré ñã túú ndècu ndihí ñaha-í xii-ndo te ío ñí cáà-í. ² Te càháⁿ ndàhú-í núu-ndó sã cáda-ndó nàcuáa vá càháⁿ ñí-í núu-ndó òré quixi-í quixi coto ñaha-í xii-ndo. Te cuení-í sá ndihí tnúhu ñí iní-xi cáháⁿ ndihí-í cue ñáyi-u càchí sá ñí-ni cuu-í ndihí cue ñáyi-u ñã túú sãndáá iní tnúhu Xítoho Jesucristú. ³ Te nchúhú cùu-ndí cue tée ñuyú-a, dico ndècu ndee-ndí quidé-ndí nàcuáa ndàcu-ndí dáquèe tíhú-ndí nchaa sá cuèhé sá dúhá, dico ñã díú mèe-ndí ducaⁿ ndàcu-ndí quidé-ndí, ⁴ te ni ñí sá ío ñuyú-a ñã túú chindèe ñaha-xi, chi mee Yã Ndiöxí chindèe ñaha-gá xii-ndí dáquèe tíhú duuⁿ-ndí nchaa núu sã cuèhé sá dúhá. ⁵ Te xíãⁿ nõu ñíhí-ndí tnúhu càháⁿ-ndí sàdí-ndí yuhu cue

ñáyiú càháⁿ tnúhu sá ñà túú cùu váha iní Yă Ndiöxí, ñáyiú xĩquide nínu mee-xi càchí sá ñà túú nàndíhi tnúhu-gá. Te quìde-ndí sá ñáyiú-án quìndáá iní-yu tnúhu Xítohó Jesucristú. ⁶ Te nchúhú sa ndècu túha-ndí sá dáquètíhú-ndí cue ñáyiú ñá túú cuìní cada nàcuáa cuìní Xítohó Jesucristú, dico díhna-gá xíní ñùhu-xi sá ncháá nchòhó ñáyiú cuìní cada nàcuáa cuìní-gá cundáá-ndó.

⁷ Te nchòhó nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuèndá-ndí. Chi núu cùtnuní ndáá iní-ndó sã cúú-ndó cuèndá Xítohó Jesucristú, te diu-ni ducaⁿ taú-ndó càni iní-ndó cuèndá-ndí tucu. ⁸ Te Xítohó Jesucristú ní taxi-gá tnúhu ndee ìní ndécú ndíhi-ndí sá dánèhé ñáhá-ndí xii-ndo nàcuáa cuita cuehnu nihnu-ndo ìchi-gá quíhíⁿ, te ñá díú sã dánèhé ñáhá-ndí xii-ndo nàcuáa cuita nihnu-ndo, te cuèi na chido-gá-í càháⁿ-í cada nínu-í mée-í cuèndá tnúhu ndee ìní ní taxi Xítohó Jesucristú ndécú ndíhi-ndí, dico vá cúcàhaⁿ núu-í chi càháⁿ ndáá-í. ⁹ Te ñá túú cuìní-í sá nchòhó caní iní-ndó sã yùhú dáyùhú ñáhà-í xii-ndo nàcuáa ndùu tnúhu càháⁿ-í núú tùtú-í. ¹⁰ Te dava-ndo càchí-ndó sã ténàá ñáhà-í xii-ndo núú tùtú-í, te mee-ni tnúhu càhnu sá ìo cùnuu cuu-xi, te càchí tucu-ndo sã òré ndécú ndíhi ñaha-í xii-ndo te ñá túú càa-í sá cúú-í ìⁿ téé cùu váha cùu dico iní-ndó, te càchí tucu-ndo sã ñà túú tnàhá iní-ndó nàcuáa quìde-í òré dácuàha ñaha-í xii-ndo. ¹¹ Te nchòhó ñáyiú ducaⁿ càháⁿ cada cuèndá váha-ndo sã dàtná-ni càháⁿ-ndí núú tùtú-ndí diu-ni ducaⁿ quìde-ndí òré ndécú ndíhi ñaha-ndí xii-ndo.

¹² Te nchúhú, vá cúú tnàhí càháⁿ-ndí sá ìⁿ-ni

cuu-ndí ndihí cue ñáyiú càháⁿ váha cuèndá méé-xí, chi ñáyiú-áⁿ sání iní-yu ná cúú sǎ váha te quidé-yu te xǎⁿ càchí-yu sá ío váha quidé-yu, te càchí-yu sá quidé váha-gá-yu dàcúúxí tnàha ñáyiú-yu, te sá dúcáⁿ càháⁿ-yu te quidé-yu dàtná quidé cuè ñáyiú ñá túú tnàhí cùtnuní iní-xi. ¹³ Te dico nchúhú ñá túú xidó-ndí càháⁿ váha-ndí cuèndá-ndí, chi càháⁿ váha-ndí cuèndá-ndí dico nàcuáa ndùu chiuⁿ ní taxi Yá Ndiõxí càháⁿ-ndí, chi mee-gǎ ní cachí-gá ndèè není sáá-ndí càháⁿ-ndí tnúhu-gá, te ní sáá-ndí ndéé ñuú-ndó càháⁿ-ndí tnúhu-gá. ¹⁴ Te vitna ndècu ndihí-ndí tnúhu ndee iní sá tnàhá nchòhó cuu càháⁿ ndihí ñaha-ndí xii-ndo, chi díhna-gá nchúhú ní quixi-ndí ní càháⁿ-ndí tnúhu Xítohó Jesucrístú ñuú-ndó, tnúhu sá càháⁿ nàcuáa naníhí tàhú-ó. ¹⁵ Te nchúhú ñá túú quide cahnu-ndí méé-ndí cuèndá chiuⁿ quide dava-gá-güedé que-saha-ndí sá chíúⁿ mèe-ndí cúú-xí. Te cuení-ndí sá nchòhó cuita quindáá-gá iní-ndó Xítohó Jesucrístú, te ducaⁿ te níhí-gǎ-ndí nàcuáa cada-ndí chiuⁿ-gá nchaa dava-gá xichi núú ñí cachí-gá cada-ndí chiuⁿ-gá. ¹⁶ Chi càháⁿ-ndí tnúhu-gá tnúhu sá càháⁿ nàcuáa naníhí tàhú-ó, te yáha-gá-ndí ñuú-ndó quíhíⁿ-ndí nchaa dava-gá xichi càháⁿ-ndí, te vá cádá cahnu-ndí méé-ndí cuèndá chiuⁿ sá sà ní quide dava-gá-güedé.

¹⁷ Te cue ñáyiú cuení cada cahnu mee-xi te vá dúcáⁿ càdá-yu, chi mee Xítohó Jesucrístú ná càda cahnú-yu-gá. ¹⁸ Te nchaa ñáyiú na càháⁿ váha Xítohó Jesucrístú cuèndá-yu, ñáyiú-áⁿ cúdíú-yu núú-gǎ, te ñá túú cùdíú-yu núú-gǎ cuèndá sá càháⁿ

váha-yu cuendá méë-yu.

11

Cuendá té Păblú ndihî cuendá cue téé cāchî sá cāháⁿ tnúhu Yá Ndiǒxî te ñá ndáá

¹ Te cūnî-í sá nchòhó cada ndee iní-ndó cūndedóho-ndo tnúhu na cāháⁿ-í, chi cāháⁿ-í dàtná cāháⁿ cue ñáyiú ñá túú cūtnunî iní-xi, te cuèi nása-gá ná cūnduu tnúhu cāháⁿ-í dico chí cadá ndèe iní cūndedóho-ndo. ² Chi yúhú ío ñúhu iní ñáhà-í xii-ndo dàtná ñúhú iní ñáhá mèe Yá Ndiǒxî xii-o, te ní cāháⁿ-í tnúhu Xítohó Jesucristú núú-ndó nūu xíáⁿ ní tnahá tnúhu-ndo ndihî-gá vitna, te sá dúcáⁿ ñî quide-í te cada iní-ndó sá yúhú cúú-í dàtná ñîⁿ téé xica ndáhú te nchòhó cúú-ndó dàtná ñîⁿ xíchî cuéchî, te Xítohó Jesucristú cúú-gă dàtná ñîⁿ téé tnándaha ndihî xíchî cuéchî-ăⁿ. Te ducaⁿ càda iní-ndó chí na sàá nduu te yúhú na càni cuendá ñáhà-í xii-ndo nūú Xítohó Jesucristú, te cuu-ndo ñáyiú vá cūndècu tnahî-gá cuéchi-xi. ³ Te yúhú-í sá sàcúíhná dandàhú ñáhá-xí xì-ndo vá cánî-gă iní-ndó cànchicúⁿ nihnu-ndo ñî yuhu ñî iní-ndó ìchi Xítohó Jesucristú dàtná nchìcúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chi sàcúíhná ñî nduu-xi cóó ñî dándàhú ñáhá-xí xì-xi, chi sàcúíhná-ăⁿ ío váha ní xito-xi nàcuáa ní quide-xi ní dándàhú-xi tá Èvá-áⁿ. ⁴ Te nchòhó, quidé ndèe iní-ndó sàcūndedóho-ndo nchàa tnúhu cāháⁿ cue téé cāháⁿ ingá núú tnúhu cuendá Jèsús tnúhu sá ñà túú dānehé ñáhá-ndĭ xii-ndo, te quide ndee tucu iní-ndó ndèdóho-ndo dānehé ñáhá-güedĕ xii-ndo cuendá ingá espíritú, te ñá díú cuendá Espíritú Yă Ndiǒxî sá ñî ngūndecu ndihî-ndo

dànehé ñáhá-güedě xii-ndo, te quide ndee tucu iní-ndó ndèdóho-ndo dànehé ñáhá-güedě xii-ndo ìngá núú tnùhu sá cächí-güedé cäháⁿ nàcuáa naníhí tàhú-ndó, te ñá díú nàcuáa ndùu tnùhu sá ni sàndáá iní-ndó cuendá naníhí tàhú-ndó cäháⁿ-güedé. ⁵ Te cue téé ducaⁿ cäháⁿ-áⁿ cächí-güedé sá Yă Ndiôxí ní tendaha ñàha-gá xii-güedé xícá cùu-güedé cäháⁿ-güedé tnùhu-gá te ío cùnuu-güedé, dico ñá ndàá sá cäháⁿ-güedé tnùhu-gá. Te yúhú cùtnùní iní-í sá cuè téé-áⁿ ñá túú cùnuu-güedé dàtná cùnùu yúhú. ⁶ Te cuèi ñá túú cäháⁿ-í dàtná cäháⁿ cue téé ío váha sáá díquí-xi dico ío váha cùtnuní iní-í cuendá nchaa sá dácuàha-í, te yúhú sa quide-í nàcuáa cutnùní iní-ndó sã ìo váha cùtnuní iní-í nàcuáa ndùu nchaa tnùhu cäháⁿ-í.

⁷ Te cudana te sàni iní-ndó sã yúhú ñá túú ní quide váha-í sá nĩ quide-í mée-í dàtná ìⁿ téé ío ndàhú iní-xi, chi ñá túú ní xícáⁿ-í yáhu-í núú-ndó cuendá sá nĩ cäháⁿ-í tnùhu Yă Ndiôxí tnùhu sá cäháⁿ nàcuáa naníhí tàhú-ó nùú-ndó. ⁸ Te ní queheⁿ-í díhúⁿ nĩ taxi dava-gá cue ñáyíu ndècu ichi Xítóhó Jesucristú, te díhúⁿ-áⁿ nĩ dándóñùhu-í ní saaⁿ-í nchaa sá nĩ xini ñùhu-í cùtnàhá ní cäháⁿ-í tnùhu Xítóhó Jesucristú núú-ndó. ⁹ Te cùtnàhá ní xíndecu ndíhi ñaha-í xii-ndo te áma ní xóo cumání sã xíní ñùhu-í, te ñá túú nã ní xícáⁿ-í núú ni ìⁿ-ndo. Chi cue ñáyíu xíndecu ichi Xítóhó Jesucristú ndécú distritú Macèdoniá ní quixí-yu ní taxi-yu sá cúmăní xii-í, te ñá túú tñàhí ni dàsatú iní ñáhá-í xii-ndo cãcáⁿ-í núú-ndó nùu ná cúú sã xíní ñùhu-í, te ñíu-ni ducaⁿ càda-í. ¹⁰ Te ñíu-ni duha cäháⁿ váha-í cuendá-í te ni ìⁿ cue ñáyíu distritú Acăyá vá ñíhí-yu tnùhu cúñàhá-yu xii-í cuendá cadí-yu yuhu-í. Te mee

Xítóhó Jesucrístú náhá-gă sá ndàá càháⁿ-í dàtná càháⁿ ndáá méé-gă. ¹¹ Te cudana te sàni iní-ndó sã sà dúhá càháⁿ-í te ñá túú cùu iní ñáhà-í xii-ndo, dico ñáhá chi mee Yă Ndiöxí náhá-gă sá yùhú ío cùu iní ñáhà-í xii-ndo.

¹² Te nàcuáa-ni ta quide-í véxi te ðiu-ni ducaⁿ càda-í cuendá sá cuè téé cuení cada nínu mee-xi cächí sá ìⁿ-ni cuu ndihí ñaha-güedé xii-í vâ nihí-güedé tnúhu cáháⁿ-güedé cachí-güedé sá ìⁿ-ni chiuⁿ quide ndihí ñaha-güedé xii-í. ¹³ Te cue téé-áⁿ cächí-güedé sá Yă Ndiöxí ní tendaha ñaha-gá xii-güedé xícá cùu-güedé càháⁿ-güedé tnúhu-gá dico ñá ndàá, chi mee-ni dândahú-güedé ñáyiu ndihí tnúhu càháⁿ-güedé, te quide-güedé dàtná quidé cuè téé càháⁿ tnúhu Xítóhó Jesucrístú dico ñá ndáá sá cúú-güedé cue téé càháⁿ tnúhu-gá.

¹⁴ Te vâ cúññhu-o sã dúcáⁿ quide cue téé-áⁿ, chi mee sàcuíhná quidé-xí sã cúú-xí dàtná ìⁿ espíritú xínú cuèchi núú ío váha càa ndecu Yă Ndiöxí dico ñá ndáá sá xínú cuèchi-xi xíáⁿ. ¹⁵ Te xíáⁿ vâ cúññhu-o sã cuè téé xínu cuechi núú-xi quide-güedé sá cúú-güedé cue téé quide váha chi ñá ndáá sá quidé váha-güedé chi dândahú-güedé ñáyiu. Te nàcuáa ndùu nchaa sá quidé-güedé te ducaⁿ nàcháhu-güedé núú Yă Ndiöxí.

Té Păblú ío ndòho-dé cuendá sá cúú-dě téé càháⁿ tnúhu Xítóhó Jesucrístú

¹⁶ Te yúhú càháⁿ tucu-í dóho-ndo sã vâ cání iní-ndó sã yùhú cúú-í ìⁿ téé càháⁿ lùcú càháⁿ duha, te núu dava-ndo dùcaⁿ sani iní-ndó dico chí cádá ndéa iní cundedóho-ndo tnúhu na càháⁿ-í cuendá ducaⁿ tnáhá-í cada nínu-í méé-í. ¹⁷ Te vitna na càháⁿ-í dàtná càháⁿ ìⁿ téé ñá túú cùtnuní iní-xi,

chi tnúhu cáháⁿ-í ñá túú ìⁿ-ni cuu-xi ndihì tnúhu Xítohó Jesucristú, chi vitna cáháⁿ-í nàcuáa cada nínu-í méè-í. ¹⁸ Te ío cuéhé ñǎyiu quide nínu mee-xi cuendá nchaa sá ío ñuyúú-a te xíǎⁿ nǔu tnàhá-í cuíní-í cada nínu-í méè-í. ¹⁹ Chi cùtnuní sá nchòhó quidé ndèe iní-ndó sàcúndedóho-ndo nchàa tnúhu càháⁿ cue tée càháⁿ lùcú càháⁿ duha, te ducaⁿ quide ndee iní-ndó sàcúndedóho-ndo tnúhu càháⁿ-güedé chi càchí-ndó sǎ ïo túha-ndo. ²⁰ Te nchòhó, quide ndee iní-ndó tnì-ndo nchaa tnúhu càháⁿ cue tée quide yica ñaha xii-ndo sá cúnú cuèchi-ndo núú-güedé, te xìcáⁿ-güedé nándì sá xìcáⁿ-güedé núú-ndó, te tàxi tnuní ñáhá-güedé xii-ndo, te quide-güedé sá ïo cùnuu-güedé ndécú ndìhì ñaha-güedé xii-ndo, te càniha-güedé xii-ndo, te cuèi nchaa xíǎⁿ quidé ñaha-güedé xii-ndo dico quide ndee-ni iní-ndó. ²¹ Te nchòhó càchí-ndó sǎ cúú-ndì cue tée ñá túú ní cùyì cada nándì sá cádá, te ndáá chi ñá túú ìⁿ-ni cuu-ndì ndihì cue tée ducaⁿ xíquide.

Dico núu cue tée-áⁿ cùyì-güedé quidé ñinu-güedé méé-güedé, te tnàhá-í cùyì-í ducaⁿ càda-í. Te sá dúhá càháⁿ-í te càháⁿ-í dàtná ìⁿ tée ñá túú cùtnuní iní-xi. ²² Te núu quide cahnu-güedé méé-güedé cuendá sá càháⁿ-güedé tnúhu hèbreú, te yúhú tucu ñiu-ni tée càháⁿ tnúhu hèbreú cúú-í, àdi quide cahnu-güedé méé-güedé cuendá sá cúú-güedé cue tée israél, te yúhú tucu tnàhá-í cúú-í tée israél, àdi quide cahnu-güedé méé-güedé cuendá sá cúú-güedé ñaní tnáhá ndì Àbrahám, te tnàhá yúhú cúú-í ñaní tnáhá ndì Àbrahám tucu. ²³ Àdi quide cahnu-güedé méé-güedé cuendá sá sání iní-güedé

sá díú nũ Xítohá Jesucrístú xínú cuèchi-güedé, dico yúhú ío-gá xínú cuèchi ndisa-í núú-gă. Te sá dúhá quide cahnu-í méè-í te cãháⁿ-í dàtná ìⁿ téé ñá túú cùtnuní iní-xi, te yúhú cùú-í ìⁿ téé ío-gá quidé chiúⁿ-gá dàcúúxí cuè téé-áⁿ, te vài xito ní cuu cãniha ñáyiu xii-í, te vài xito ní cuu chìhi ñahá-yu vecaá xii-í, te vài xito ní cuu căcu căcu cahni ñaha ñáyiu xii-í. ²⁴ Te cue ñáyiu isrâél ní canihá-yu xii-í úhúⁿ xito, te ndi tnahá ìⁿ ìⁿ xito ní canihá-yu ní dáquêe-yu ócó sáhúⁿ cúmí ñi sátà-í. ²⁵ Te úní xito ní caniha tùcu ñáyiu xii-í ndihi carrùtí, te ìⁿ xito ní sáha yúú ñáhă-yu xii-í, te ní cuu úní xito quêe naa bàrcú xití ndute òré sácũhuⁿ-í, te ìⁿ xito ío ní ndoho-í ní xíndecu-í ìⁿ nduu ìⁿ niú núú ndute làmár. ²⁶ Te ío titní xichi ní cuu xica cuu-í, te dava xichi ní căcu cuido ñaha ndute ñuhu xii-í, te dava xichi ní căcu duhu ñadúhú nchaa ndachiúⁿ-í, te dava xichi ní căcu cada ñaha cuè ñáyiu cùu ndi mee-í ìⁿ sá cădá ñahá-yu xii-í, te diu-ni ducaⁿ ñi căcu cada ñaha tùcu cue ñáyiu ñá túú cùu ndi mee-í ìⁿ sá cădá ñahá-yu xii-í ní cùu, te cuèi xití ñuú te cuèi xití yucu căcu căcu cada ñaha ñáyiu xii-í ìⁿ sá cădá ñahá-yu, te diu-ni ducaⁿ căcu căcu quiní-í tnúndòho oré ñúhù-í bàrcú cuáháⁿ núú ndute làmár. Te cue ñáyiu cãhí sá ndécú ìchi Xítohá Jesucrístú te ñá ndàá căcu căcu cada ñahá-yu xii-í ìⁿ sá cădá ñahá-yu. ²⁷ Te ío ndòho-í cuendá chiúⁿ quide-í chi ío xàú-í, te ní cuu vài xito ñá túú xidí-í, te titní xito ní cuu xihí víhì-í docó, te titní xito ní cuu yìchí-í ndute, te titní xito ní cuu ñá túú tnàhí ná xéxì-í cuendá chiúⁿ quide-í, te titní xito ní cuu ndòho-í sá vïxiⁿ, te titní xito ní cuu ñá túú nihí-í dóó cuihnu-í.

28 Te ñá díú-ní xǎⁿ chi ñⁿ nduu ñⁿ nduu ío sàni iní-í cuendá nchaa ñáyi ndècu ichi Xítóhó Jesucristú xǎndecu nchaa xichi. 29 Te ndèda-ni càa ñáyi ñá túú ñíí ndéé cùndecu ichi Xítóhó Jesucristú, te ío cùndahú iní-í chi sànuu sá tñhá-í ñá túú ñíí ndèé-í cundecu-í ichi-gá sá dúcáⁿ quidé-yu. Te núu ñⁿ ñáyi quidé-yu sá ñⁿ nchohó ñáyi ndècu ichi Xítóhó Jesucristú quidé-ndó ñⁿ sá ñá túú tàú-ndó càda-ndo te vá cúú vǎha iní-í chi cudèⁿ-í. 30 Te núu xǎni ñuhu-xi sá cáda càhnu-í mée-í, te cuu ducaⁿ càda-í te cáháⁿ-í mee-ni cuendá nchaa sá quidé nàcuáa ñá túú ñíí ndéé yǐqui cuñú-í. 31 Te Dútú Ndiǒxí Yaá cúú Tátá Xítóhó Jesucristú náhá-gǎ sá yǎhú càháⁿ ndáá-í núú-ndó, te diu-gá tàú-gá cachí-ó sǎ ío càhnu cuu-gá ni caa ni quíhⁿ. 32 Te cútnhá ní xǎndecu-í ñuú Dàmascú te téé cùu gobiernú téé cùndíhi téé yǎndaha ñáyi nàni Aretás ní taxi ndecu-dé cue téé ní xǎndedí yuyèhe sá ñúhú dòco ñuú cuendá òré quee-í te tñí ñaha-güedě xii-í ní cùu. 33 Dico yúhú ní queé-í ñⁿ xití tídihi, te cue ñáyi cùndíhi ñaha xii-í ní queñuhu ñàhá-yu ndàa ventaná nchí yǐqui naha sǎ ñúhú dòco ñuú-áⁿ, te ducaⁿ te ní cácu-í ñá túú ní ndàcu-güedé tñí ñaha-güedě xii-í.

12

Té Pǎblú càháⁿ-dé sá ío vii càa sá ñí dánèhé núú ñàhá Xítóhó Jesucristú xii-dé

1 Te ñá túú ndéé nándíhi-xi sá càháⁿ váha-o cuendá mée-ó, dico vitna xǎni ñuhu-xi ducaⁿ cada-í chi cáháⁿ-í nàcuáa ní quide ñaha Xítóhó Jesucristú xii-í, chi ní quide-gá sá ñí cutnùní iní-í nàcuáa ndùu

tnúhu-gá, te vâi núú sǎ nǐ dánèhé núú ñáhá-gǎ xii-í. ² Te yúhú xìní-í ñⁿ tée sàndáá iní ñáhá xii Xítóhó Jesucrístú, te sa ní cuu úxícúmí cuiá sǎ tée-áⁿ nǐ sáá-dé ndéé andiú cùu uní, te ñá túú xìní-í te núu ndihí yiqui cùñú-dé ní sáá-dé àdi ñáhá, chi ñⁿdìi díi-ni Yá Ndiõxí náhá-gǎ te núu nása càa-dé ní sáá-dé. ³ Te yúhú càháⁿ ndáá-í cuendá tée-áⁿ, dico dàtná ní cachí-í sá ñà túú xìní-í te núu ndihí yiqui cùñú-dé ní sáá-dé andiú àdi ñáhá, chi mee Yá Ndiõxí náhá-gǎ te núu nása càa-dé ní sáá-dé. ⁴ Te tée-áⁿ nǐ sáá-dé ñⁿ xichi núú ïo váha càa andiú, te yàcáⁿ ní xíndedóho-dé tnúhu mee-ni sǎ cúú-xí cuendá méé-dé, te tnúhu-áⁿ vǎ cúú tnàhí cáháⁿ-dé núú nì ñⁿ ñáyiu. ⁵ Te yúhú quidé ññu-í tée-áⁿ, dico mee-ï ñá túú càháⁿ váha-í cuendá-í cuendá cada nínu-í méè-í, chi càháⁿ-ni mee-ni cuendá nchaa sá quidé nàcuáa ñá túú ñihí ndéé yiqui cùñú-í. ⁶ Te núu dícó yúhú cuìní-í te cuu cáháⁿ váha-í cuendá-í cuendá cada nínu-í méè-í, te núu ducaⁿ na càháⁿ-í te ñá túú cùu-xi ñⁿ tnúhu neñúú cáháⁿ-í, chi cùu-xi ñⁿ sá càháⁿ ndáá-í te núu na càháⁿ-í. Dico vá dúcáⁿ càda-í chi cuìní-í sá nchòhó cada cuendá-ndó nàcuáa ndùu tnúhu càháⁿ-í ndihí nàcuáa quide-í, te ducaⁿ mèe-ndo cáháⁿ-ndó te núu ná tée cùu-í, te ñá díú sǎ yúhú cáháⁿ váha-í cuendá méè-í cuendá nchòhó cachí-ndó sǎ ïo cùnuu-í.

⁷ Te sá nǐ dánèhé núú ñáhá Xítóhó Jesucrístú xii-í cúú-xí sǎ xidó ïo váha, te cuendá sá vǎ cáda càhnu-í méè-í nñu xíáⁿ Xítóhó Jesucrístú ní quide-gá duha ndòho yiqui cùñú-í vitna. Te sá dúcáⁿ quide ñaha-gá xii-í te xíáⁿ sácúíhná nǐ ñihí-xi ichi càhnu dandoho ñaha-xi xii-í. ⁸ Te ní cuu úní xito càháⁿ ndàhú-í núú Xítóhó Jesucrístú sá ná cáda-gǎ nàcuáa vá ndóhó-gǎ yiqui cùñú-í. ⁹ Dico mee-gǎ càhí-gá xii-í: “Yúhú ïo

cùndahú iní ñáhà-í xii-n chìndee ñaha-í, te ñá túú ñá cùmǎni xii-n, te cùtnuní sá ïo-gá chìndèe-í cue ñáyiú ñá túú ñihí ndéé cùndecu”, duha ní cachí-gá xii-í. Te xiǎⁿ ñü yúhú ío cùdǎí iní-í sá ñá túú ñihí ndéè-í ndécù-í, chí ðiu cuendá xiǎⁿ Xítóhó Jesucristú ñá túú dàña nihnu ñaha-gá xii-í chìndèe ñaha-gá. ¹⁰ Te xiǎⁿ ñü cùdǎí iní-í sá dúhá ñá túú ñihí ndéè-í ndécù-í, te cùdǎí tucu iní-í cuendá nchaa tnúhu cuèhé tnúhu duha càháⁿ ñáyiú cuendá-í, te cùdǎí iní-í cuendá nchaa sá ndóhò-í, te cùdǎí tucu iní-í cuendá sá quidé ñàha ñáyiú xii-í, te cùdǎí tucu iní-í cuendá nchaa dava-gá sá ndóhò-í cuendá Xítóhó Jesucristú. Te òré ñá túú ñihí ndéè-í te Xítóhó Jesucristú chìndèe ñaha-gá xii-í ñihí ndéè-í.

Té Pǎblú ío sàni iní-dé cuendá cue ñáyiú xǐndecu ichi Xítóhó Jesucristú ndécú ñüú Còrintú

¹¹ Te cùu-í dàtná ìⁿ téé ñá túú cùtnuní iní-xi sá dúhá càháⁿ váha-í cuendá-í, te ducaⁿ quide-í chí mee-ndo quide-ndo sá dúcáⁿ càháⁿ-í, dico mee-ndo tàú-ndó càháⁿ váha-ndo cuendá-í ní cùu. Te dava cue téé ío quide cahnu-güedé méé-güedé, te cachí-güedé sá Xítóhó Jesucristú ní táuchíúⁿ-gǎ sá càháⁿ-güedé tnúhu-gá, dico yúhú cúnüu-gá-í dàcúxí cuè téé-án cuèi ñá túú vèdana ná cùu-í ndécù-í ñuyíú-a. ¹² Te cúnàhá ní xǐndecu ndihí ñaha-í xii-ndo ïo ní quide cahnu iní-í nándi sá ñí yáha-í ní quide-í chiuⁿ Xítóhó Jesucristú sá cúu-xí-ndó. Te ní chindee ñàha-gá xii-í ní quide-í titní núú sǎ vǎ yǒo tnàhí ndàcu cada te ní cuñúhu-ndo, te sá dúcáⁿ ñí chindee ñàha-gá xii-í ní cutnùní iní-ndó sǎ yúhú cúu ndisa-í ìⁿ téé ní cachí Xítóhó Jesucristú sá càháⁿ-í tnúhu-gá. ¹³ Te

yúhú ñⁿ-ni quide ndìhì ñaha-í xii-ndo ndìhì nchaa dava-gá cue ñáyíu ndècu ichi Xítóhó Jesucrístú, te dícó-ni sá yúhú ñá túú ní cuìní-í taxi-ndo sã xíní ñùhu-í dàtná ní quide-í dava-gá-yu. Te núu ñá túú ní quide váha-í sá dúcáⁿ ñí quide-í ñá túú ní cuìní-í chindee ñàha-ndo te chí cádá càhnu iní ñáhá xii-í.

¹⁴ Te vitna sa ndècu túha-í sá quíxì-í núu ndécú-ndó, te sá quíxí còto ñaha tucu-í xii-ndo cùu-xi xito cuu úní sá quíxì-í, te cuìní-í sá vã dándìhú-ndó ìní-ndó ndùcu-ndo sá táxì-ndó cùu xii-í, chi ñá díú xǎⁿ ndèé iní-í chi mee-ndo ndèé iní-í quixi-í. Te duha càháⁿ-í chi nchòhó xíní-ndó sã cuè téé cùu tátá sãñaha-güedě sá cúú-xí cuè déhe-güedé te ñá díú cuè déhe-güedé sãñaha-güedé sá cúú-xí mèe-güedé. ¹⁵ Te yúhú ío váha cùu iní-í dandòñuhu-í sá ndécú ndìhì-í nàcuáa ndacu-í chindee ñàha-í xii-ndo cùndecu váha-ndo sã cúú-xí Yà Ndiòxí chi ío cùdí ìní-í, te cuèi na cùu-í sá cuendá-ndó, chi ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sànuu sá nchòhó ñá túú cùu iní ñáhá càvihi-ndo xii-í.

¹⁶ Te nàha-ndo sá ñà túú ní dándìhú-í iní-ndó ñá taxi-ndo cùu xii-í, dico dava-ndo càchí-ndó sã ío váha ní xito-í nàcuáa ní quide-í nàcuáa ní dándàhú ñáhà-í xii-ndo. ¹⁷ Te chí càháⁿ te núu yúhú ní dándàhú ñáhà-í xii-ndo ndìhì cue téé ní tendaha-í ní quixi coto ñaha xii-ndo. ¹⁸ Te ní cáháⁿ ndàhú-í núu tẽ Titú ndìhì núu ìngá tucu téé ndècu ndìhì-o ichi Xítóhó Jesucrístú ní quixi coto ñaha-güedě xii-ndo. Te nchòhó cútnùní iní-ndó sã tẽ Titú ñá túú ní dándàhú ñáhá-dě xii-ndo, te ducaⁿ chi ñⁿ-ni sàni iní-ndí te ñⁿ-ni quide-ndí.

¹⁹ Te cudana te sàni iní-ndó sã sà dúhá càháⁿ-ndí

te tàunihnu-ndí mée-ndí, dico ñá díú dùcaⁿ quee-xi tnúhu càháⁿ-ndí, chi càháⁿ-ndí nàcuáa tàú-xi cáháⁿ-ndí chi ndècu ndíhi-ndí Xítóhó Jesucrístú, te mee Yă Ndiǒxí náhá ndăá-gá nàcuáa ndùu tnúhu càháⁿ-ndí, te nchaa sá càháⁿ-ndí cúú-xí cuendá nchòhó cue ñáyiú ío cùu iní-ndí, te càháⁿ-ndí nàcuáa cundecu váha-ndo ìchi Xítóhó Jesucrístú. ²⁰ Te ío sàni iní-í cuendá-ndó chi na cuáháⁿ te òré quixi-í quixi coto ñaha-í xii-ndo, te ñá túú quide-ndo nacuáa cuu váha iní-í, te sá dúcáⁿ te yúhú cáháⁿ-í nàcuáa vá cúú vâha iní-ndó, te ducaⁿ ïo sàni iní-í cuendá-ndó chi na cuáháⁿ òré quexìo-í te nàá-ndó, àdi ndecu-ndo ichi cuédú íní, àdi cudééⁿ nùú tnáhá-ndó, àdi ñá túú cùu ìⁿnuu-ndo ndecu-ndo, àdi cáháⁿ cuèhé-ndó cuendá tnàha ñáyiú-ndo nùú chítú nùú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo. ²¹ Te ío sàni iní-í cuendá-ndó chi na cuáháⁿ òré quixi-í, te Yă Ndiǒxí cada-gá te cucahaⁿ núù-í sá cuendá-ndó, te ío ndíhú iní-í cuendá-ndó te núu vátá dáñá-gă-ndó nchàa sá cuèhé sá dúhá nǐ ngüíta-ndo quide-ndo ndéé sanduu, te vâi-ndo ní ngüíta-ndo dùcaⁿ quide-ndo, chi ndècu-ndo ichi díí ìní te nândi-gá nchaa sá cuèhé sá dúhá quide-ndo, te ducaⁿ ïo ndíhú iní-í te núu vátá dáñá-gă-ndó nchàa xíáⁿ.

13

Tnúhu ndéé núú nǐ ndíhi-ná

¹ Te sá quixì-í vitna núú ndécú-ndó cùu-xi xito cuu úní sá quixí còto ñaha-í xii-ndo. Te càchí tnúhu-í xii-ndo sǎ òré cundáá cuéchi-ndo te canehe núú úú àdi úní ñáyiú cáháⁿ ndáá nàcuáa

ndùu cuéchi-ndo. ² Te yúhú sa ní cáháⁿ-í dóho-ndo cùtnàhá ní quixi-í ní quixi coto ñaha-ĩ xii-ndo xìto cuu úú, te ñiu-ni ducaⁿ càháⁿ tucu-í dóho-ndo vitna vátá quíxí tùcu-gá-í quixi coto ñaha-ĩ xii-ndo. Te nchòhó ñáyiú ní cunduu ñí ngúíta quide nchaá sá cuèhé sá dúhá, tenàá ñáhà-í xii-ndo òré quexìo-í te núu vátá dáñá-gă-ndó nchàa sá cuèhé sá dúhá quide-ndo te tnàhá nchaá dava-gă-ndó tènàá ñáhà-í xii-ndo. ³ Te nchòhó cuìní-ndó quìní-ndó núu ndáá sá quidè-í núú Xìtohó Jesucristú càháⁿ-í yuhu-gá, dico dàvá-áⁿ cutnùnì ndáá iní-ndó. Te Xìtohó Jesucristú quidé-gă nàcuáa cutnùnì iní-ndó sã ìo càhnu cuu-gá te ñá túú quide-gá dàtná quidé ìⁿ ñáyiú ñá túú ñìhí ndéé cùndecu. ⁴ Te Xìtohó Jesucristú ní ndoho-gá dàtná ìⁿ ñáyiú ñá túú ñìhí ndéé cùndecu, chì ní sahnì ñaha-güedě xii-gá núú cùrúxí dico mee Yă Ndiöxí ní quide-gá ní ñìhí ndéé Xìtohó Jesucristú ní ndoto-gá ndécú-gă vitna, te tnàhá nchúhú tucu ducaⁿ yăha-ndí ñá túú ñìhí ndéé-ndí cundecu-ndí, dico mee Yă Ndiöxí chíndèè ñaha-gá xii-ndí ñìhí ndéé-ndí ndécú-ndí cuèndá sá ndécú ndìhi-ndí Xìtohó Jesucristú, te xíáⁿ núu ndàcu-ndí quidé-ndí nàcuáa tàú-xi cunduu sá cúú-xí-ndó.

⁵ Te chí cádá cuèndá váha te núu ndisa sá sàndáá iní-ndó tnùhu Xìtohó Jesucristú, te núu ndáá sá ndécú-ndó ìchi-gá te cùtnunì iní-ndó sã ndécú-ndó ndìhi-gá. ⁶ Te cuìní-ndí sá nchòhó cutnùnì ndáá iní-ndó sã nchúhú ndécú ndìhi ndisa-ndí Xìtohó Jesucristú. ⁷ Te nchúhú càháⁿ ndìhi-ndí Yă Ndiöxí cuèndá-ndó cuèndá sá vă cádá-ndó ñí ìⁿ sá cuèhé sá dúhá, te vá cánì iní-ndó

să sà dúcáⁿ cãháⁿ ndihî-ndí-gá cuendá-ndó, te cuínî-ndí sá nchòhó cutnùnî iní-ndó sã nchũhú ío ndècu yiñuhu-ndí núú-gã, te ñáhá chi cãháⁿ ndihî-ndí-gá cuendá-ndó chi cuínî-ndí sá nchòhó cada váha-ndo cùndecu-ndo cuéi sàni iní-ndó sã nchũhú cúú-ndĩ cue téé ñá túú ndècu yiñuhu núú-gã. ⁸ Te nchúhú mee-ni cãháⁿ váha-ndí cuendá tnúhu ndáá tnúhu Yá Ndiõxí, te ñá túú cãháⁿ-ndí ìⁿ tnúhu sá ñà túú tàú-xi cãháⁿ-ndí cuendá tnúhu-áⁿ. ⁹ Te cùdíí ìní-ndí sá ñà túú-gã xínî ñũhu-xi cada-ndí nàcuáa níhî ndéé-ndĩ tenáá ñáhá-ndĩ xii-ndo cãháⁿ-ndí dóho-ndo, chi nchòhó sa ní níhî ndéé-ndó ndècu-ndo ichi-gá. Te nchúhú cãháⁿ ndihî-ndí Yá Ndiõxí cuendá-ndó cuendá sá nchòhó cundáá-ndó cùndecu-ndo ñá túú-gã ná cumánî-ndó núú-gã. ¹⁰ Te xĩáⁿ nõu duha ndũu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndihî ñaha-í xii-ndo, cuendá sá òré ná cùndecu ndihî ñaha-í xii-ndo te vá ío níhî cãháⁿ-í dóho-ndo nàcuáa ndũu tnúhu ndee ìní ní taxi Xítohó Jesucrístú ndécú ndihî-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cánúichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiu ndècu ndihî-ndí ichi Xítohó Jesucrístú ío quíde ndee iní ñáhá-ndĩ xii-ndo, te ío chí ndúcú nàcuáa cada-ndo cundáá-ndó núú Yá Ndiõxí cuendá sá ñà túú tnáhî-gã ná cumánî-ndó núú-gã, te ndee ndèe cada iní-ndó cùndecu-ndo, te chí cúú ìⁿnuu cundecu ndihî tnaha, te ducaⁿ te Yá Ndiõxí cundecu ndihî ñaha-gã xii-ndo chi ío cùu iní ñáhá-gã xii-o, te ñiu-gá quídé-gã ío váha cùu iní-ó ndècu-o. ¹² Te

ndihì tnúhu yĩñùhu chí cádá ndèe iní tnáhá. ¹³ Te nchaa ñáyiú cùu cuendá Yă Ndiǒxí ndécú ìha quide ndee iní ñáhă-yu xii-ndo.

¹⁴ Te xìcáⁿ táhú-ndǐ núú Xǐtohó Jesucristú sá ò na chìndee chítúu ñaha-gă xii-ndo. Te mee Yă Ndiǒxí ná cádá-gă nàcuáa cutnùní iní-ndó sǎ ò cùu iní ñáhá-gă xii-ndo, te Espíritú-gá cundee cùu cahnu iní-ndó cùndecu-ndo. Te ducaⁿ na cùnduu. Te ío chí cádá ndèe iní-nă vitna.

Tnúhu ní cáháⁿ yá ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

872f7754-0986-5ecd-a059-925a708a6939